

Segunda Carta de San Pablo a los

CORINTIOS

Saludo

1 ¹Yũ, Pablo cawāmecucu, Dios yũre cū caboro jūgori Jesucristo yau apóstol* cū caquetibujurotjow majũ yũ āniña. Bairi marĩ yau, Timoteo mena mujãã ñubueri majã Dios ya poa macããna Corinto macã macããnarẽ mujãã woajow yũ átiya. Tunu bairoa aperã Dios ya poa macããna Acaya yepa nipetiropu macããna cūãrẽ woajow yũ átiya. ²Bairi tunu marĩ Pacu Dios, marĩ Quetiupau Jesucristo mena caroare mujãã na jonemoáto. Caroaro yerijorõ animasirĩqũẽ cūãrẽ mujãã na jonemoáto.

Sufrimientos de Pablo

³Diore cū marĩ basapeoto, marĩ Quetiupau Jesucristo Pacu majũrẽ. Cūã, marĩ Pacu marĩrẽ caĩnamai majũ niñami. Cū, Dios puame tocãnacãnia roro popiye marĩ catũgoñayapapuarõ, marĩ yerĩ ñuo joroque caátinucũ niñami. ⁴Cū puame nipetiro roro popiye marĩ catãmũonucũrõ, marĩ juátinemonucũñami. Bairo marĩ cū caátiere masirĩ, marĩ cūã roro popiye cabairãrẽ na marĩ juátinemonomasigarã. Marĩrẽ cū cajuátinemonomasirõ jĩcãrõ tũnia marĩ cūã aperãrẽ na marĩ juátinemogarã. ⁵Jesucristo

yarã ānirĩ popiye cū cabairicarorea bairo popiye marĩ bainucũña. Bairo nocãrõ popiye marĩ catãmũorõ cãrõã marĩ catũgoñatutuapee cūãrẽ marĩ jonucũñami. ⁶Bairi jãã cūã popiye jãã tãmũonucũña. Caroaro netõmasirĩ Jesucristo mena mujãã catũgoñatutuapeere borã, jãã puame roro popiye jãã tãmũonucũña. Bairo popiye jãã cabaimiatacũãrẽ, jãã juátinemonucũñami Dios, jãã cūã mujããrẽ jãã cajuátinemonomasiparore bairo ĩ. Bairo jããrẽ ĩnacõrĩ yua, mujãã puame tũgoñaenarẽ bairo tutuaro mena mujãã nucãnetõmasicõãgarã popiye jããrẽã bairo mujãã catãmũonucũrĩjẽrẽ yua. ⁷Bairi mujãã mena caroaro cariape jãã tũgoñatutuacõãña. Cariape merẽ jãã tũgoñamasĩna: Mujãã cūã jããrẽã bairo popiye peeto ũno cabairã ānirĩ, jããrẽã bairo caroaro tũgoñatutuarique cūãrẽ cacũgoparã majũ mujãã āniña Dios cū cajorije majũrẽ yua.

⁸Yũ yarã, nocãrõ popiye Asia yepapu āna, jãã catãmũorĩqũẽrẽ mujããrẽ jãã quetibujũnemoña tunu. Nocãrõ popiye netõõrõ majũ catãmũorã ānirĩ, merẽ jãã nucãjiãteticobujjowũ. Cayasicoaparãrẽ bairo jãã tũgoñawũ, ti yepapu āna. ⁹Capajĩãecoyasirãrẽ bairo majũ jãã tũgoñawũ. Bairi, “Marĩ majũ rupau

mena marí catũgoñarõ jũgori marí netõmasiẽna,” i tũgoñamasirí yua, Dios mena jeto jãã tũgoñatutuajũgowu. Cũ roque camasã cariacoa na caãnimiatacũãrẽ, tunu na catinemo joroque caácu cũ caãnoi, cũ mena jeto cariape jãã tũgoñatutuajũgowu. ¹⁰Dios puame roque roro jãã catãmuorijẽrẽ jãã netõõwi. Bairi cũ puame nocãrõ roro jãã cayasibujiopeere jãã netõõgumi. Caroaro cariape jãã tũgoñatutuacõãña jããrẽ Dios cũ canetõõcõãnipeere. ¹¹Tore bairo roro jãã catãmuorijẽrẽ jãã netõõcõã nigumi, Diopure jãã mujãã cajẽnibojaaata. Bairi marí nipetiropuã jicãrõ Diore cũ marí basapeogarã, nocãrõ caroaro jãã cũ caátibojarijere ñnarí. Capããrã aperã cũã tore bairo cũ basapeogarãma.

Por qué no fue Pablo a Corinto

¹²Bairãpuã, jicã wãme jũgori jãã useaniã: Jãã catũgoñaata, caroaro jicãrõ tũni ati umurecõopure jãã átiãniã. Mujãã watoapure ãna, tore bairo majũ jãã átiãninucũwũ. Tere tũgoñarí jãã useaninucũña. Tore bairo jãã caátianie puame jãã majũ jãã camasirijẽ jũgori mee, Dios cañuu ãnirí tore bairo jãã átiãnimasiõ joroque átiyami. ¹³Jãã cartaaripure ricaati wãme bueri mujãã tũgomawijiao joroque jãã woajoetinucũña. Bairi cariape jicãrõ tũni mujãã catũgomasirõ yu boya jãã caátianinucũrijẽrẽ. ¹⁴Merẽ bairãpuã peeto mujãã tũgomasĩña jãã caátianinucũrijẽrẽ. Nemojãñurõ mujãã camasĩnemorõ boya. Bairi marí Quetiupau Jesús ati yepapũ cũ catunuatí rũmũ caãno, caroaro jicãrõ tũni jããrẽ masĩpetiri bero jãã mena mujãã useanigarã. Jãã cũã mujãã mena caroaro jicãrõ tũni jãã useanigarã, mujãã caátianajẽ cũãrẽ ñnarí yua.

¹⁵Tore bairo mai tere masĩtũgoñarí, caãnijũgoro mujããrẽ ññaau

áгатũgoñamiwũ. Tore bairo mujããrẽ yu caĩñauápata, puãgani cãrõ mujããrẽ ññaãñesẽãnemobujio. ¹⁶Mai, caãnijũgoro, Macedonia yepapũ ácu, mujãã ññaãnetõájũgoga tũgoñamiwũ. Tore bero, topũ caatácu tunuácu mujãã ññaãnetõ ánemogamiwũ tunu. Bairo yu cabaiata, mujãã puame Judea yepapũ yu caátó, yu mujãã juátinemo jobujioricarã. Tore bairo yu catũgoñamiatacũãrẽ, cariape yu baimasiẽpũ. ¹⁷Bairi mujããrã, çyu caátipeere caroaro cariape tũgoñaecũã, tore bairo ññuparí? ¿Mujããrẽ itou, “Yũ águ,” o “Yũ áperigu,” puãgani cãrõ ññemopeocuti? Tore bairoã jicã riseroa ñraana, jãã ññemopeoetinucũña.

¹⁸Dios cũã caroaro cariape masĩñami tiere. “Mujããrẽ jãã ññarágara,” o “Jãã áperigarã,” jicã riseroa ñraana, jãã ññemoeotinucũña. Tere Dios cũã masĩñami. ¹⁹Yũ, Timoteo, bairi Silvano mena, Jesucristo Dios macũ yaye quetire jãã quetibujunucũña. Cũ yaye queti puame cariape ñña. Jicã risero ñmicũã, ricaati ñriqũẽ mee ñña. Toreã bairo jãã cũã jicã riseroã jãã busunucũña. ²⁰Jesucristo puame Dios cũ caĩquetibujũgoyeticũriqũẽ nipetirijere caátipeyoy majũ ññami. Bairo caácu cũ caãnoi, Diore cũ marí cabasapeoripau caãno, “Bairo to baiáto,” marí ñnucũña. ²¹Cũã ññami Dios mujããrẽ, bairi jãã cũãrẽ cabesericu, Jesucristo yarã marí caãnimasiparore bairo í. Tunu bairoã jããrẽ cũ yaye quetire cajũgoquetibujuparã majũ jãã cũwi. ²²Bairi cũ yarã cawãmecũna marí ãnio joroque marí ásupi. Espíritu Santore marí yeripu cũ joyupi Dios, “Nipetirije cũ caĩjũgoyeticũricãrõrã bairo átipeyocõãgumi,” marí caĩmasiparore bairo í.

²³Baipua, yu caáгатũgoñarícãrõrẽ bairo Corinto macãpu áperiri, jicã

riseroa ímicūā, ricaati í mee yu baiya. Mújāā, caroaro mujāā caānipeere bori mujāā tųpųe yu ápéwų. Tiere Dios cūā cariape masīñami. ²⁴Bairi tutuaro mena mujāā caátipeere mujāā átirotigarā mee, tore bairo jāā quetibųjuncūña. Merē bairāpųa Dios mena caroaro catųgoñatutuarā mujāā āniña. Caroaro marí nipetiro useaniríqűē mena nemojāñurō Diore marí camasīparore bairo, mujāārē juátinemorā bairo jāā quetibųjuya.

2 ¹Bairi yu pųame tunu, “Roro na yapapuo joroque na yų átibujioų,” í, mujāārē ñiñañeseānemou ápéwų. “Atopųa yu tuacōāgu mai,” ñi tųgoñawű. ²Bairi mujāā yapapuo joroque mujāā yų caīñaríjē jųgori yų caápata, ¿noa mena yų tųgoña useanibųjiocuti? Mujāā roque yų tųgoña useanio joroque caána majű mujāā āniña. Bairi roro mujāā yapapuo joroque yų átinemogaepų. ³Bairi merē mujāārē cajųgoye jícā carta mujāā yų woaquetibųjű jųgoyetijowų. Mujāā tųpų yų caāno, yų yapapuo joroque mujāā caáperiparore bairo í, yų woaquetibųjű jųgoyetijowų. Yų useanio joroque mujāā caáto bootųgoñarí tore bairo yų ápų. Bairi cariapea yų masīña mujāā mena yų causeaninucűrjē. Jícārōrēā bairo nicōāña. ⁴Bairpųa mujāārē yų sawoajori rűmų caāno yų caíwoajopeere tųgoñarí roro majű yapapuari yų otinucűwű. Bairo cabaimiatacűārē, mujāā tųgoña yapapuo joroque í mee, mujāārē yų woaquetibųjűjowų. Mujāārē nocārō yų caīñamairjē. Bairāpųa roro camasārē cű caátitomasinucűrjē. Caroaro majű merē marí masjāñuña.

**Perdón para el que había
ofendido a Pablo**

⁵Bairi ni ũcű yųre yų yapapuo joroque caácų pųame, yų jeto meerē

tore bairo ácumí. Bairpųa mujāā cűārē peeto ũno mujāā yapapuo joroque ásupi. Netōncārō majű ĩgaecu “peeto ũno” mujāārē ñi quetibųjuya. ⁶Tore bairo roro marí baio joroque caácųre tutuaro merē capāārųpųa mujāā mena macāāna mena cűrē mujāā cabeyorique merē ñujāñuña. Tunu mujāā caátinemopee maniña. ⁷Bairi yua, āmerē cűrē roro cű mujāā caátajere masiritiri cű mujāā cajuáto ñuña. Roro netōrō yapapuari cű ānimasjētű joroque ápericōāña. ⁸Bairi tunu mujāārē ñinemoña: Caānijųgoro cűrē mujāā camairicārōrē bairoa āme cűārē cű mainemoña. ⁹Bairi cajųgoyepų ati wāme yų caquetibųjűrjere mujāā yų quetibųjű woajųgowų. Cariapea, “Yų caátirotirijere na átimasjgamiñati,” í masjgu, tiere mujāā yų woatujowų. ¹⁰Ni ũcűrē roro mujāā caátajere mujāā camasiritibojaata, yų cűā tiere cű yų masiritibojagu. Bairi roro cű caátaje caāmata, cű yų masiriyobojagu, nocārō mujāārē camai ānirí Cristo cű caīñajoro yua. ¹¹Bairo marí caāmeo átimasjāta, wătí pųame marí rocatu masjētjgumi. Bairāpųa roro camasārē cű caátitomasinucűrjē. Caroaro majű merē marí masjāñuña.

Intranquilidad de Pablo en Troas

¹²Troas macāpų Cristo yaye quetire yų caquetibųjűetaro, to macāāna capāārā marí Quetiupųa yaye quetire tųgogamiwā. ¹³Bairo na catųgogamiatacűārē, yų pųame caroaro yerjōrō yų ānimasjēpų marí yų Titore yų cabocāetaeto jųgori yua. Bairi to macāānarē átaje uwiri bero, ato Macedoniapų yų aticoapų yua.

Victoriosos en Cristo

¹⁴Jícāñ pajjārí majā quetiupųa cű capajjātunuetari bose rűmų caetaro,

cū ūmuarē cū capūna nūcārotirore bairo marī cū canetōricārā cūārē Jesucristo mena marī neñarotiyami Dios. Tunu bairoa cajutiñurijē werea ūnie na cabusemugōjoro nipetiropū cabusejesapeticoatore bairo nipetiropure cū yaye quetire quetibujabatou átiyami Dios marī caquetibujunetōrijē jūgori. Tiera tūgoñarī, “Dios, jāā mena mu ñujāñuña,” jāā ĩnucūña. ¹⁵Bairi marī Jesucristo yarā āna, Dios pūame cū useanio joroque ána, marī átiya. Werea incienso* cajutiñurijērē Jesucristo cū pacure cū cabusemugō jorijere bairo caāna marī āniña. Bairo caroaro cariape marī yeri marī cañinucūrījērē nipetiro camasā ĩñajesa peticoanucūñama. Bairi canetōparā, cayasiparā cūā nipetiro jīcārōā ĩñajesa peticoanucūñama caroaro marī yeri mena marī caátianierē. ¹⁶Cayasiparā puamerā, marī pūame carorije capūnirijē cabusejorore bairo na marī āniña. Marī ūna cū yaye quetire catūgousarā cū canetōparā puamerā, marī pūame caroa cajutiñurijē cabusejorore bairo na marī āniña. Bairi ni jīcāū ūcū cū majūā cū camasīrijē mena Dios yayere quetibuju masīcūmi. Dios cū camasīōrijē jūgori roque quetibuju masīñami. ¹⁷Bairāpua capāārā aperā Dios yaye quetire quetibujuganucūñama, tie mena paio wapatagarā. Jāā pūamea narē bairo jāā áperinucūña. Jesucristo yarā, Dios cū cajoricarā ānirī, cū cañajoro caroaro cariape nūcūbūgorique mena jāā quetibujunucūña.

El mensaje del nuevo pacto

3 ¹Mujāārē tunu atore bairo jāā caquetibujuaa, “Jāā majūā jāā caátiere ĩñarī, jāā mujāā cabasapeopee boya,” ĩrā mee jāā ĩña. Tunu bairoa

mujāā pūame jāārē masīmirācūā, “¿Tie na cabuerije ñujāñuña,” aperā mujāā na caīwoabojajūgoyetirica pūrōrē mujāā bootūgoñañati? ¿O ti pūrō ūnorē mujāārē jāā cajēninucūrōrē mujāā boyati? Tore bairo jēninucūñama aperā mujāātū caquetibujuñesēārī majā. ²Mujāā pūame roque ti pūrō ūnorē bairo caāna majū mujāā āniña. Bairi noa ūna camasā, mujāārē jāā caquetibujurije jūgori mujāā yeripu tūgoñawasoari caroaro cariape mujāā caátianierē ĩnarī, “Pablojāā na cabuerije ñujāñuña,” na caīpee niña. ³Bairo jāā caquetibujūro jūgori Jesucristo pūame mujāā yeri wasoao joroque mujāā ásupi. Camasā apeye ūnie buipū na cawoaturo ūnorē bairo jūgori mee, Espīritu Santo cacati majū cū camasīrijē jūgori mujāā yeri wasoao joroque mujāā ásupi. Apeye ūtā ūnie bui mee, camasā cū yarā yeripure woatūre bairo mujāā wasoayupi.

⁴Bairi Dios mena jāā catūgoñatutuarije jūgori tore bairo cariape mujāārē jāā ĩmasīña, Jesucristo yarā ānirī. ⁵Jāā majū jāā camasīrijē jūgori mee, Dios jāārē cū camasīōrijē jūgori roque tore bairo caroaro jāā átiāñajē cutimasīña. ⁶Dios pūame roque masīrīqūērē jowī, camasārē cawāma wāme cū caátibojacūrīqūērē jāā caquetibujumasīparore bairo ĩ. Cū caátibojacūrīqūē pūame bui macāājē paperapū woaturiquere bairo mee niña. Espīritu Santo jūgori marī pupeapu yeri tūgoñawasoarique majū niña. Moisés ānacū cū caroticūrīqūērē na cawoatucūrīqūē ūnie marī yasio joroque caátipee majū niña. Espīritu Santo, Dios Yeri pūame roque marī caáticōā ninucūō joroque caācū majū niñami.

⁷⁻⁸Tie roticūrīqūē ūtāāpū Dios cū cawoaturique pūame nocārō tutuaro

caasiyaborije mena etajūgoyupa. Bairi israelita majā puame tiere Moisés ānacū cū caneatō, cū riapére peeto ūno cūārē īnacānamu masiēsupa. Bairo tutuaro mena caasiyabatomiatacūārē, jīcā rūmu caāno, caasiyaborije capetipee añupā. Bairo tie Moisés ānacū cū caroticūrīqūē camasā na yasio joroque caátipee puame caasiyarije mena caetarique caāmata, inocārō tutuaro netōrō to etaetibujocuti camasārē cawāma wāme Dios cū caátibojacūrīqūē! Espiritu Santo marī yeripū cū caānie puame roque netōjānurō caroa niña. ⁹Bairo īgū niña: Jīcā wāme roticūrīqūē caasiyarije mena caetarique caāmata, inocārō tutuaro netōrō to etaetibujocuti Dios yaye queti, camasārē, “Carorije wapa mánarē bairo mājāā niñaña,” cū caīrīqūē queti puame! ¹⁰Bairi Jesucristo yaye cawāma queti mena cajūgoyepū Moisés ānacū cū caroticūrīqūērē marī caīnacōñaata, caānimajūrījērē bairo mee tuacōāña yua. Bairi Jesucristo yaye queti puame ñinetōmajūcōāña. ¹¹Tore bairo caasiyaborije capetipee yoaro jāñurō caānajē caāmata, nemojāñurō caroa majū niña capetietie Jesucristo yaye queti puame roque.

¹²“Di rūmu ūno Jesucristo yaye queti capetietie niña,” ī tūgoñarī, uwiricarō mano camasārē tiere na jāā quetibujūncūña. ¹³Moisés ānacū cū caátatore bairo jāā, jāā āperinucūña. Cū ānacū puame, “Israelita* majā yū riapé caasiyarije capetiro īñarema,” ī, cū riapére juti asero mena buatonucūñañupū. Cū ānacūrē bairo yasiori jāā quetibujūnetinucūña camasārē. ¹⁴Bairāpua, ti yūtea macāña israelita majā tiere tūgopuoesupa. Āme cūārē torea bairo na pārāmerā cūā

tūgopuoetinucūñama Dios na cū caquetibujūgamirījērē. Na camasīpeere juti asero caēñotarore bairo na ēñotatonucūña. Bairo ānimirācūā, Jesucristo mena na catūgoñatutuata roque, tie Dios yaye caroa quetire tūgomasiījātigarāma. ¹⁵Āmepū cūārē Moisés ānacū cū cawoaturica tutirire buerā, tūgopuojiātietinucūñama. Caroaro na catūgomasiībujiopeere mai, juti aserore bairo na ēñotacōā ninucūña na catūgoñarījēpure. ¹⁶Bairo cabaimiatacūārē, ni jīcāū ūcū roro cū caátinucūrījērē pitiri Dios puamerē cū catūgousajūgoata, jutirore bairo caēñotarije peticoagaro yua. Bairo cabairo, caroaro tūgomasi jūgogūmi yua Dios yaye quetire. ¹⁷Marī Quetiupau cū caátie, bairi Espiritu Santo cū caátie cūā jīcārōrēā bairo niña. Bairi noo ūno Espiritu Santo cū caāmata, ñe ūnie mano caroaro cariape átīanimasiñama camasā. ¹⁸Bairo cabairo jūgori yua marī nipetiro Jesucristo yarā caāna puame juti asero ūno mena cabūgatoecorārē bairo mee marī āniña. Dios yaye quetire caroaro cariape merē marī masīña. Tunu bairoa ēñoorōrē muipū cū caasirocaturore bairo marī cūā caroaro marī caátīānie, marī Quetiupau yaye nocārō caroa macāājērē marī átī īnonucūña camasārē. Marī Quetiupau, cū Yeri Espiritu Santo jūgori marī wasoanutuao joroque marī átīnucūñami marī yeri marī catūgoñarījērē. Bairo cū caāto jūgori yua, tocānacā rūmua nemojāñurō cūrē bairo caānajēcūna marī āninemonutuanucūña.

4 ¹Dios puame jāārē cañnamai ānirī cū yaye caroa quetire jāā quetibujūnetōrotijowī camasārē. Bairo cū caátirotiricarā ānirī jāā puame tiere paajutiricarō mano caroaro

jāā quetibujunucūña. ²Bairi tunu cañuena yasioropu rorije na caátie ũnie caboborijere jāā boetinucūña. Ītorique mena Dios yaye quetire jāā quetibujuetinucūña. Diore cañapeocorā ānirī tie queti cūārē wasoaricarō mano caroaro cariape jāā quetibujunucūña. Tore bairo cariape macāājērē jāā caquetibujurijere jāārē camasīrā tiere caroaro masicōāñama. ³¿Bairi jāā caquetibujurijere noa na tūgopuoetinucūñati? Cayasiparā jeto tiere tūgopuoetinucūñama Jesucristo camasārē cū canetōrijē quetire. ⁴Cariape na catūgogaetie bui, ati yepa macāacū quetiupau wātī puame caroaro na catūgomasiñbujiopeere catūgomasiñenarē bairo na átiēñotayami. Bairi cañāpāmasiēna muipū cū caasibatorijere na cañācānamumasiētīnucūrōrēā bairo na cūā Jesucristo yaye nocārō caroa quetire di rūmu ũno tūgomasiētīnucūñama. Nocārō caroú, Dios catutuau cū cañanjē cutiere bairo cañanjēcucu yaye quetire na tūgomasiētīō joroque átinucūñami wātī. ⁵Jāā puame, jāā majūā jāā caátie na ĩroáto ĩrā mee, mujāārē jāā quetibujunetōnucūña. Jesucristo marī Quetiupau ĩcāūā cū cañnierē quetibujurā jāā átinucūña. Bairi jāā puame mujāārē capaabojarā, cajuátī majārē bairo jāā āninucūña, Jesucristore jāā cañāmairijē jūgori yua. ⁶Dios puame cawāmapaupure ati yepa naitiārō cañimirīcārōrē to busuo joroque ásupi. Cūā niñami āme cūārē marī yeri canaitiārōpu cañnierē bairo marī cañanjē cutiere cabusuropu to ānio joroque caācu majū. Tore bairo átinucūñami Dios, cū macū Jesucristo nocārō cañuū caroaro cū caátie ĩñarī bero, Dios cū cañanjē cutiere marī camasīparore bairo ĩ Jesucristo jūgori.

El vivir por la fe

⁷Bairi atie Dios nocārō cū catutuarijere jāā camasīnucūrījē puame, cawapacutie netōjāñurō jāārē cañurijē niña. Bairo tiere masīrī aperā camasārē na jāā quetibujunetōnucūña. Bairo caquetibujurā nimirācūā, ati rupau puamerā catutuaenarē bairo caāna jāā āniña, rīiru cawatiasiparure bairo yua. Bairo jāā cabaiānierē ĩñarī nipetiro camasā, “Na catutuarije jūgori mee, Dios cū catutuarije jūgori roque tore bairo quetibujū masīñama,” jāā ĩ masīnucūñama. ⁸Ati yepapure āna, roro popiye jāā bainucūña. Bairo cabairā nimirācūā, “¿dope bairo marī bairāti?” di rūmu ũno jāā ĩ tūgoñāetinucūña. Tunu bairoa roro popiye jāā cabairije mena tūgoña yapapumirācūā, di rūmu jāā quetibujū jānaetinucūña. ⁹Roro popiye jāā tāmuo joroque jāā átiepenucūñama. Bairo roro na caāna jāā cañimiatācūārē, Dios puame di rūmu ũno jāā aweyoetinucūñami. Jāārē capajīāmasīrā nimirācūā, jāā yeri puamerē dope átiyasiomasiētīñama. ¹⁰Bairi noo jāā caānucūrīpau cārō jāā cūā Jesucristo roro na cū caátie cogaricarorea bairo roro cayasicoaparārē jāā ānicotenucūña jāā wapana jūgori. Bairo Jesucristo cū cabairiquere bairo jāā cūā roro popiye tāmumirācūā, caroaro cū caānjē cutie macāājē cūārē jāā áti ĩñomasīnucūña camasārē. ¹¹Tunu bairoa jāā nipetiro, tocānacā rūmua capajīāecoparārē bairo jeto jāā āninucūña, Jesucristo yarā ānirī. Bairo cabairā nimirācūā, caroaro Jesucristo cū catutuarijere camasārē caátī ĩñoparā jāā āniña ati rupau cayasipa rupau mena. ¹²Tore bairo jāā puame Jesucristo yaye quetire quetibujurā,

roro jāā tām̄uonucūña. Bairo jāā cabaimiatacūārē, jāā caquetibūjurije jūgori m̄ujāā puame yeri capetietiere cacūgoparā majū m̄ujāā āniña.

¹³Bairo Dios jāārē cū cacotemasīnucūrījērē tūgoñatutuari uwiricarō mano jāā quetibūjunucūña cū yaye quetire. Torea bairo ī woatuyupa Dios ya tutipū cūārē: “Dios mena tūgoñatutuari cū yaye quetire uwiricarō mano camasārē na yū quetibūjunucūña,” ī woatuyupi. ¹⁴Bairi cariape merē marī masīña: Dios puame, Jesucristo cū cariacomiatacūārē cū catitunuo joroque cū caátatorea bairo jāā cūārē jāā catiogumi. Bairo jāā catiori bero m̄ujāā jīcārōā marī neágumi cū caāno um̄urecōopu yua. ¹⁵Nipetiro popiye jāā catām̄uorījē bainucūña, caroaro m̄ujāā canetōmasīpeere īrō. Bairo m̄ujāā mena macāāna aperā nemojāñurō Cristore* catūgousarā na caāninemoata, nemojāñurō Dios cūārē cū na cabasapeopee cūā nigaro, nocārō marī mena cañu cū caāno jūgori.

¹⁶Bairi popiye baimirācūā, jāā puame cayeritutuenaerē bairo jāā tūgoña yapapuaetinucūña. Ati rupau mena tocānacā rūm̄ua cabucua jūgoyecua nimirācūā, jāā yeri jāā catūgoñarījē puame nemojāñurō jōpuame cawāma yeri majū cacūgorā jāā ānijūgoyecutinucūña. ¹⁷Bairopua atie, ati yepapu āna roro popiye jāā catām̄uonucūrījē capetipee niña. Bairi ñe mee niña jāārē. Bairo popiye baimirācūā, cabero netōjāñurō caroa capetietipeere cacūgoparā majū jāā āniña. ¹⁸Bairo cabairo jūgori butiōro majū ati yepa macāājē caānierē jāā īroaetinucūña. Bairi āme marī caīñaetinucūrījē um̄urecōo macāājē Dios marī cū cajopee puamerē jāā īroanucūña. Ati yepa macāājē

capetipee majū niña. Um̄urecōopu macāājē roque tocānacā rūm̄ua caānicōāninucūpee majū niña.

5 ¹Bairi marī rupau puame ati yepa macāā wiire bairo niña. Ti wii caboarorea bairo caboapa rupau majū niña. Bairo marī rupau caboamiatacūārē, Dios puame roque caroa rupau majū marī qūēnogumi um̄urecōopu. Ti rupau puame di rūm̄u ūno caboaeiti rupau, capetieti rupau majū nigaro. Camasā na caāta rupau mee nigaro. Tiera merē caroaro marī masīcōāña. ²Bairi marī puame ati rupau mena āna, marī jutinucūña. īTame! Merē āmea um̄urecōo macāā rupau marī ya rupau caānipa rupaupū roquere marī ānicōāgamiña. ³Ti rupau cawāma rupau cūgo wasoari cawāma jutii cajāñawasoarārē bairo marī ānigarā. Bairi carupau mánarē bairo marī āmerigarā yua um̄urecōopure. ⁴Bairi ati yepapu āna mai, marī yeri jīnijānucūña, roro cayapapuanucūrā ānirī. Marī puame marī rupaure cajutiwe ecorārē bairo marī ānigaetiya. Torea bairo Dios marīrē cawāma rupau cū cajāñawasoaro roquere marī boya. Bairo Dios marī cū caāto ati rupau cayasimiatacūārē, cawāma rupau puame ānijūgogaro yua. ⁵Dios puame roque tore bairo marī cabaimasīpeere marī qūēnoyubojau átiyami um̄urecōopure. Cūā, marī jowī cū Yeri Espiritu Santo cūārē, cawāma rupau mena marī cacaticōānipeere marī cacūgomasīparore bairo ī yua.

⁶Bairi marī puame Dios mena marī tūgoñatutuacōāniña. Ati rupau marī caānijūgori rupau mena āna, marī Quetiupau tūpū caāmerārē bairo caāna marī āniña. ⁷Āmerē mai, cū marī īñaetinucūña. Bairo cūrē caīñaena nimirācūā, cū mena marī tūgoñatutuacōāña. ⁸Ati rupaure marī

pitigacɔɔɔ, jicoquei marī Quetiupau tɔɔɔ marī cañiparore bairo irā. ⁹Bairi tocānacāni jāñurīpua marī Quetiupau marīrē cū caññaseanipeere marī bonucūña. Tore bairo marī boya, ati rupau marī cacūgori rūmɔ caño, o cūtu ɔmɔrecóopu marī caāmatacūārē yua. ¹⁰Marī nipetiro Jesucristo cū caññabeserī rūmɔ caño, ati yepau āna tocānacā wāme marī caátajere, cūrē caññabese ecoparā majū marī āniña. Ti rūmɔ caño ati rupau mena āna, caroa wāme, o rori wāme marī caāta wāme cārō iñacōñarī, tie wapa marī wapa jogumi.

El mensaje de la paz

¹¹Bairi, “Marī Quetiupaure nipetiro camasā cū na canucūbugoro boya,” ī tūgoñarī, camasārē Cristo yaye quetire na masiō joroque jāā átijāitiganucūña. Tore bairo caroaro cariape jāā catūgoñanucūrījērē Dios cūā masicōñami. Bairi mujāā cūā tiere mujāā camasārō ñuña. ¹²Mujāārē tunu atore bairo jāā caquetibujua, “Jāā majūā jāā caátiere iñarī mujāā cabasapeopee boya,” irārē bairo mee jāā iña. Bairo puame mujāā caátore borā jāā iña: Jāā caátianierē caroaro masicōñarī, “Cariape quetibujuyama Pablojāā,” aperā ricaati caquetibujurārē na mujāā caīquetibujumasīpee ūnierē borā jāā iña. Tore bairo átimasietimirá, ricaati caquetibujurā puame, “Cañurā niñama,” inucūñama, camasārē na rupau bui macāājē jetore cañnarā nimirācūā. Camasā na yeri na catūgoñarījēpue masietimírācūā, tore bairo ī busunucūñama. ¹³Na ūna jāārē, “Mecūrā baiyama,” jāā na caimiatacūārē, jāā puame Dios yaye macāājērē āna jāā átiya. Ape watoara caroaro cariape jāā

caátiere mujāā caññaata, caroaro mujāā caátianimasīpeere āna jāā átinucūña. ¹⁴Jesucristo butiuro marīrē cū camairījērē tūgoñarī popiye baimirācūā, cū caborore bairo jāā átiānajē catinucūña. Jesucristo jīcāūā marī nipetiro popiye marī cabaibujoriquire marī riabojoyupi. Bairi cū mena cariaricarārē bairo marī tuaya. Bairo cū cariabojariquere cariape jāā camasījūgoricapauɔpina yua, tocānacā rūmɔ cū carotirore bairo jeto jāā átinucūña.

¹⁵Marī carorije wapare netōgu, marī riabojoyupi Jesús. Bairo tiere tūgoñarī marī majūā marī cabooro caáperiparā marī āniña. Marī Quetiupau marī carorije wapare riabojari bero cacatitunurīcū cū carotirore bairo jeto caátiparā marī āniña.

¹⁶Bairi jāā puame ati ɔmɔrecóo macāāna, aperā camasārē bui macāājē na rupau na caññabeserore bairo jāā áperinucūña. Mai, cajūgoyepure torea bairo yu tūgoñarīqūē cūtimiwū. “Jesucristo, cabugoro macāācū ācūmi,” ñi tūgoñanucūmiwū yu cūā. Amerē yua, bairo mee yu tūgoñaña. ¹⁷Bairi ni jīcāū ūcū Jesucristore catūgousajūgon ape yeri cacūgoupu niñami. Roro cū caátinucūrīqūērē caátijānarīcūpu niñami. Bairo roro cajūgoyepu cū caátianajērē pitiri bero, caroa macāājē jeto caátianinucūā majū tuayami yua.

¹⁸Atie nipetirije Dios marī cū cajuátie, marī cū caátibojarije niña. Cū puame jīcā yeri pūnarē bairo cū mena marī ānio joroque marī ásupi Jesucristo marī Quetiupau jūgori. Tunu bairo nipetiro camasā cū mena jīcā yeri pūnaacunarē bairo na ānio joroque í, cū yaye quetire jāā quetibujunetōrotiwī. ¹⁹Bairo puame īgu ñiña: Dios puame ati ɔmɔrecóo macāāna nipetirore Jesucristo mena

na catũgoñatutuario jũgori cũ mena jĩcã yeri pũnaacunarẽ bairo na añio joroque ácu baiyami. Camasã roro na caátinucũrĩjẽrẽ na netõbojagumi Dios, Jesús mena na catũgoñatutuata. Tie caroa quetire camasã na camasĩparore bairo ĩ, jãã quetibũjnetõtrotiwĩ.

²⁰Bairi Jesucristo yaye quetire cabuerã, cũ cacũrĩcãrã majũ jãã añiña. Mujããrẽ Dios cũ majũã cũ caátitrotirijere, jãã jũgori mujããrẽ tore bairo átrotiyami: Dios mena busũqũẽnoña. Cũ mena jĩcã yericũnarẽ bairo añajẽcusa. ²¹Cristo carorije caápei cũ cañimiatacũãrẽ, marĩ carorije wapa cũ riao joroque ásupi Dios. Bairo cũ ásupi cũ macũrẽ, carorije wapa mánarẽ bairo marĩ cũ caĩñaparore bairo ĩ.

6 ¹Bairi yua, jãã puame Dios yaye paariquere cajuátinemorãrẽ bairo caña añirĩ mujããrẽ jãã iña: Dios nocãrõ cañũ añirĩ mujãã cũ cajuátĩãnierẽ ññateeticõãña. ²Torea bairo ĩcũñupĩ Dios cũ ya tutipũ cũãrẽ:

“Yoaro mee yũre mũ cajẽnirĩjẽrẽ mũ yũ tũgobojagu.

Bairo mũ tũgobojari yua, camasãrẽ yũ canetõrĩ rũmũrẽ mũ yũ juátinemoꝑũ,” ĩ quetibũjũyupi cũ ya tutipũre.

Bairi ãmea ãno baiya Diore marĩ catũgousamasĩpa rũmũ majũ. ĩ ãmea Dios marĩ carorije wapare cũ canetõrĩ rũmũ majũ ãno baiya!

³Bairi jãã puame noa ùnarẽ jĩcãni ùno roro jãã áti ññoetinucũña. Jãã paarique cawapa manie, cabũgoro macããjẽrẽ bairo to tuaeticõãto ĩrã, roro aperãrẽ jãã áti ññoetinucũña. ⁴Bairo puame roque jãã átinucũña: Nipetiro dise ùnie jãã caátĩ wãme cãrõ Dios paabojari majã jãã cañnierẽ jãã áti ññoãninucũña. Popiye tãmuomirãcũã, tũgoñaenarẽ bairo tiere caroaro mena jãã nũcãcõãnucũña. Tunu bairoa

jããrẽ carusarijere, jããrẽ roro na caátigarije cũãrẽ caroaro mena jãã tũgoñanetõcõãnucũña. ⁵Tunu apeyera roro jãã na cabape eperije, roro preso jorica wiiripu jãã na cacũeperije cũãrẽ jãã nũcãnetõcõãnucũña. Jããrẽ roro átigarã, aperã neñarĩ na caawajatuti epenucũrĩjẽ, apeye tutuario jãã capaanucũrĩjẽ, popiye ñamiĩ cũãrẽ jãã cawũgoa tãmuonucũrĩjẽ, jãã caaũatãmuonucũrĩjẽ, tie nipetirijere jãã nũcãnetõcõãnucũña. Tore bairo caroaro jãã canũcãmasĩrĩjẽ jũgori Diore paabojari majã jãã cañnierẽ jãã ññonucũña. ⁶Torea bairo caroarã jãã yeri jãã cañajẽ cutie, cariape macããjẽ quetĩ caroaro jãã catũgomasĩrĩjẽ cũãrẽ camasãrẽ jãã áti ññoãninucũña. Tunu bairoa patowãcãrĩcãrõ mano caroaro yeri jõrõ caña añirĩ camasãrẽ caroaro na jãã juátinemonucũña. Tunu bairo Espĩritu Santo jãã mena cũ caño jũgori caroaro cariape ĩtoricarõ mano camasãrẽ jãã camairĩjẽ jũgori nipetiro camasã masĩñama Dios yarã paabojari majã jãã cañnierẽ. ⁷Tunu bairoa jãã caquetibũjũrije cariape macããjẽ quetire, Dios cũ catutuarije jãã mena caño jũgori nipetiro camasã masĩñama Dios yarã paabojari majã jãã cañnierẽ. Bairi jãã puame cariape ãnimasĩrĩ yua, wãtĩrẽ jãã canetõnũcãpeere, o jãã camasatoye cutipee cũãrẽ jãã cũgonucũña. Tie, cariape ãnimasĩrĩquẽ puame jãã besure bairo cañnie majũ niña. Tie jũgori di rũmũ ùno jãã wapana roro jããrẽ na caátigaro jãã ãñotamasĩnucũña. ⁸Bairi camasã puame ape rũmũrẽ jãã ĩroanucũñama. Ape rũmũ cañnorẽ butiro jãã ññatenucũñama. Ape rũmũ caño caroaro busũnucũñama jãã caátĩãnierẽ. Ape watoare roro busũpainucũñama jãã caátĩãnierẽ. Ape rũmũrẽ caĩtopairãrẽ bairo jãã

ĩnanucũñama, caroaro cariape jāã caquetibujumiatacũãrẽ. ⁹Tunu bairoa caroaro jāãrẽ camasĩrã nimirãcũã, ape majã na camasĩena ũnarẽ bairo jāã ĩnanucũñama. Cariacoanarẽ bairo tũgoñamirãcũã, jāã masacuti añijũgonucũña. Apeyera popiye jāã baio joroque átimirãcũã, jāã pajĩãreetinucũñama bairãpua.

¹⁰Tunu bairoa yapapuarãrẽ bairo baumirãcũã, tocãnacã rũmua jāã useanicõã ninucũña. Tunu apeyera cabopacarãrẽ bairo nimirãcũã, jāã caquetibujuriye jũgori capããrã camasãrẽ cabopacaenarẽ bairo na añio joroque na jāã átinucũña. Tunu ñe ũnie cacũgoenarẽ bairo baumirãcũã, nipetiro jāã cũgocõãña jāãrẽ carũsarijere.

¹¹Yũ yarã Corinto macããna, cariape ĩtoricarõ mano jĩcãrõ tũni jāã cabairijere mujããrẽ jāã quetibujuya. Jãã camasã cutiãnie nipetirijere mujãã masĩõ joroque jāã quetibujuya.

¹²Jãã puame mujãã mena ricaati wãme jāã tũgoñarĩqũẽ cuperinucũña. Mujãã puame roque jāãrẽ roro ricaati tũgoñarĩqũẽ ũnie mena jāã mujãã ĩna ãninucũña mujãã yerĩpu mena. ¹³Bairi mujããrẽ atore bairo yũ átirotiya, jĩcãũ capacũ cũ pũnaarẽ beyou, cũ caãtirotirore bairo yua: Yũ mena caroaro tũgoñarĩqũẽcusa. Ricaati wãme yure tũgoña macãẽtĩcõãña. Yũ, mujãã mena caroaro yũ catũgoñauseanirõrẽ bairo mujãã cũã caroaro tũgoñarĩqũẽcusa yũ menarẽ.

Somos templo del Dios viviente

¹⁴Jesucristo yaye quetire catũgousaena mena añijesoeticõãña. Dope bairo caroa, carorije mena jĩcãrõ añimasĩẽtĩña. Tunu bairo cabusurije cũã busumirõcũã, canaitĩãrĩjẽ mena jĩcãrõ ãmerĩnucũña. ¹⁵Torea bairo

Jesucristo wãtĩ mena jĩcãrõ tũnia na caãmeo useanipee maniña. Bairi apeĩ Jesucristore catũgousau cũã apeĩ catũgousaecu mena caroaro jĩcãrõ añimasĩẽtĩñama. ¹⁶Tunu bairoa apeyera ñe ũnie jũgori Dios ya wii ñubuerica wii puame aperã na jũgũẽãrẽ na caũbuerije macããjẽ mena jĩcãrõ añijesomasĩẽtĩña. Mariã, Dios, cacati majũ ya wiire bairo caãna majũ marĩ añiña. Cũ majũ cũã atore bairo ĩñupĩ marĩ mena cũ caãnipeere:

“Na mena ãcũ, na watoaru yũ añiñesẽãgu ti yeparũre.

Yua, na pasu Dios majũ yũ añigu.

Bairi na puame yũ ya poa macããna majũ nĩgarãma jĩcã macãrẽ bairo yua, ĩñupĩ Dios.

¹⁷Tunu apeyera bairi atore bairo ĩnemoñami marĩ Quetiupau: ‘Carorã watoare ãmericõãña.

Na watoare tocãrõã witiweyocõãña.

Tunu bairoa carorije ũnie caũuetie cũãrẽ peeto ũno ápericõãña.

Bairo mujãã caãto roque yua, yũ yarã majũ mujãã yũ átigu.

¹⁸Bairo mujãã átiri, yũ puame mujãã pasu majũ yũ añigu.

Mujãã puame yũ pũnaa caũmua, carõmia cũã, yũ pũnaa majũ mujãã añigarã yua,’

ĩ quetibujuyami marĩ Quetiupau nocãrõ catutuau majũ yua, ĩ woatuyupa Dios cũ caĩrĩqũẽrẽ cũ ya tutĩpu.

7 ¹Bairi yũ yarã, yũ camairã, atie mujããrẽ yũ caquetibujuriye puame tirũmũpua Dios caroaro marĩ cũ caãtiga jũgoyeticũrĩqũẽ majũ niña. Tore bairo cabairo jũgori marĩ puame, roro marĩ baio joroque caãtiere caãtiecoeticõã ninucũparã marĩ añiña. Marĩ yerire caroaro uguerĩ manorẽ bairo cacũgoparã marĩ añiña. Marĩ

rupau cūārē torea bairo cacūgoparā marī āniña. Diore cū tūgousari, ñe ūnie wapa mána caroarā majū cū caññajoro cañniparā marī āniña.

La conversión de los corintios

²Jāā mena asiaeticōāña. iMujāā yeripū jāārē bootūgoñaña! Jāā puame noa ūna mena roro na jāā āmerīnucūwū. Tunu bairoa noa ūnarē roro jāā āperinucūwū. Tunu bairoa ni jīcāū ūcū mujāā mena macāācūrē jāā itoñesēāēpū. ³Atiere yu caībusuata, mujāārē roro busupaicotei mee ñiña. Merē bairina mujāārē cajūgoyepu ñi quetibujwū: Mujāā, yu mena jīcā yericūnarē bairo caāna mujāā āniña. Catiāna, jīcā poa marī āniña. Marī cariaro beropu cūārē, jīcā poa marī ānigarā. ⁴Bairi caroaro cariape mena mujāā yu quetibujyua, mujāārē caroaro camasī ānirī. Tunu bairoa caroaro mujāā caātīānierē masīrī butiuro majū yu tūgoña useaniña mujāā mena yua. Popiye yu cabairije watoa to ānimitacūārē, yu yeri ñuña. Bairo caroaro yeri ñurī yua, mujāā mena pairo yu tūgoña useaniña.

⁵Ato Macedonia yepapu jāā caetaricarō beropuina mai, di rūmu jāā yeri jāētīmajūcōāña. Popiye jāā cabainucūrījē tocānacāūpuā nicōā cotenucūña jāārē. Tie jūgori roro tāmūonucūrī yua, butiuro jāā yeri uwitūgoñariqūē mena jāā āninucūwū. ⁶Tore bairo jāā cabaimiatacūārē, aperā cayapaparārē na tūgoñatutuawēpūō joroque caācu, Dios puame jāā tūgoñawēpūō joroque jāā āmi marī yau Tito cū caetarije jūgori yua. ⁷Bairāpuā cū caetarije jūgori jeto meerē ñnarī, jāā yeri tūgoñawēpūwū. Cū cūā caroaro mujāā caātīānierē ñnarī, nocārō mujāā mena cū catūgoñauseanirījērē ñnarī, jāā cūā jāā yeri tūgoña useaniwū.

Bairi cū puame jāārē butiuro mujāā caññagarije queti cūārē jāā quetibujwū Tito. Tunu bairoa roro popiye mujāā jūgori yu cabairijere tūgori, butiuro mujāā catūgoña yapapuarije cūārē jāā quetibujwū. Tie nipetirije quetiere tūgori roque yua, nemojāñurō yu tūgoña useaninucūña.

⁸Cajūgoyepu mujāā yu cawoajorica carta jūgori mujāā yapapuaō joroque mujāā yu āpu mai. Bairo mujāā baio joroque átomicūā, yu puame āmerē yu yapapuaetinucūña. Bairpuā, cajūgoyepu ti cartare yu cawoatari rūmurē butiuro yu tūgoña yapapuaō. Bairpuā, yoaroaca mee mujāā yapapuaō joroque āsupa yu carta puame yua. ⁹Bairi āmerē yu tūgoña useanijāñuña. Ti carta mujāārē yapapuaō joroque caātaje meerē yu useaniña bairpuā. Yu cawoajoriquere tūgori yua, mujāā carorijere yapapua tūgoñarī, Dios puamerē cū mujāā catūgousariquere masīrī, butiuro yu useaniña. Bairo cūrē cū tūgousari yua, popiye bai yapapua mirācūā, cū caborore bairo jeto mujāā ātiāninucūña. Bairo mujāā caātīānierē ñnarī, “Narē roro marī āpeyupa,” jāā ñ tūgoña useaninucūña yua. ¹⁰Jicāū caūmurē roro popiye cū tāmūo joroque ātimasīñami Dios, roro cū caātinucūrījērē cū capitimasiparore bairo ñ. Bairo cū cayeri wasoata, qūñña jesoyami Dios. Bairo roro cū caātiere cū capitiro ñnarī yua, Dios cū netōgumi roro cū cabaibujiopeere. Yasiricaropu āpérīgumi. Bairi dope bairo puame ñ yapapua masīā mano yua. Cabaimiatacūārē, ni ūcū roro popiye cū yaye wapa baiyapapua micūā, Dios mena cū cabusuqūēnoeticōāta, yasicoagumi. ¹¹Roro popiye mujāā tāmūo joroque mujāā cū caātinucūrījērē mujāā canucānetōcōā nucūrījērē ñnarī

useaninucũnami mujãã mena Dios. iPopiye mujãã catũgoñayapapuarero bero ape yeri mujãã tũgoñaõ joroque caátajere tũgoñañijate! Bairi mujãã yu caquetibujũwoajoriquere bueri bero, tie caĩrõrẽ bairo nucũbugorique mena mujãã tũgoyupa. Tunu bairoa yu cũãrẽ nucũbugorique mena caroaro yu mujãã tũgoñotayupa aperã yure roro na caĩbujiopeere yua. Bairi yua roro mujãã caátinucũrĩjẽ mena tũgoña yapapuari yoaro mee tiere mujãã cũñupã carorijere. Bairo roro mujãã caátinucũrĩjẽ mena tũgoña uwiri, yu puame mujãã mena yu caãno mujãã bootũgoñañupã. Bairo tũgoña uwiri, roro caácu mujãã mena macããcũ cũãrẽ mujãã cabeyogaetimircũrẽ yua tutuaro mena cũ mujãã beyoyupa. Tore bairo mujãã caátipetimasĩrĩjẽ jũgori yua, “Carorijere caboena niñama,” mujãã i ñagaráma aperã camasã. ¹²Bairo mujããrẽ woajou, roro caátacure, bairi cũ pacu roro caátiecoricu jeto meerẽ tũgoñarĩ yu woajowu. Mujãã cũãrẽ tũgoñarĩ tore bairo yu quetibujũ woajowu. Dios cũ caĩñajoropũ jããrẽ caroaro mujãã catũgousarijere mujãã masĩõ joroque Ñ, ti cartare mujãã yu woajowu. ¹³Atie jããrẽ mujãã camaitũgoñarĩjẽrẽ queti tũgori bero, jãã yeri tũgoñatutuacõãña.

Bairãpua tie jũgori jeto meerẽ tũgori jãã yeri tũgoñatutuaya. Tito cũã, caroaro mena cũ mujãã cabocáriquere cũ causeanirijẽrẽ ñnarĩ, jãã cũã butioro jãã yeri tũgoña useaniña. Bairi mujãã puame Titore cũ yeri ñuo joroque cũ mujãã ásupa tunu. ¹⁴Merẽ Tito mujãã tũpũ cũ caápáro jũgoyepua, “Caroaro mũ bocágarãma Corinto macããna,” cũ ñi quetibujũ jũgoyetiwu. Bairi cũ yu caĩrĩcãrõrẽã bairo caroaro mena cũ mujãã bocáyupa Titore. Yu puame cariape

jeto tocãnacãnia ñi busunucũña. Di rũmu ñno mujããrẽ caĩtoũre bairo ñietinucũña. Bairi mujãã cabairijere Titore yu caĩquetibujũricarea bairo cariape baiyupa. ¹⁵Tunu bairoa cũ puame, cũ mujãã caátajere tũgoñarĩ, mujããrẽ tũgoñamaijãñunucũnami, nocãrõ nucũbugorique mena cũ bocãri, cũ caĩrĩjẽrẽ mujãã catũgousarique jũgori. ¹⁶iBairi caroaro mujãã caátijũgocõãnipeere tũgoñarĩ, butioro majũ yu useaniña!

Generosidad en las ofrendas

8 ¹Bairi ãmerẽ apeyera, yu yarã mujããrẽ jãã quetibujũgaya nocãrõ Dios cũ camairijẽ jũgori ñubueri majã Macedonia macããna caroaro na caátianierẽ. ²Na puame roro popiye majũ wãti na cũ caátieco rotimiatacũãrẽ, caroaro useanirĩquẽ mena tũgousacõã ninucũñama. Tunu bairoa cabopacarã majũrẽ bairo nimirãcũã, cabopacaenarẽ bairo paio jĩcãrõ tũni Diore na cajorijere jonucũñama. Aperãrẽ na cacũgorije mena na juátinemonucũñama. ³Yu cũã tore bairo na caátiere ñiñanucũwũ. Na cacũgoro cãrõ na cacũgorijere na jomasĩnucũñama aperã cabopacarãrẽ. Ape watoara na cacũgoro netõjãñurõ na jonucũñama cabopacarãrẽ. Na caboro, na caátimasĩrõ tore bairo átinucũñama aperãrẽ. Bairi tiere yu masĩjãñuña. ⁴Bairo caátimasĩrã ãnirĩ jãã cũãrẽ butioro tie dinerore na cajuátie macããjẽrẽ jãã cañebojaro bomiwã. Dios ya poa macããna Jerusalén macããnarẽ juátigarã, butioro tiere jãã cañebojaro bomiwã. ⁵Na puame jãã catũgoñarõ netõjãñurõ caroaro juátinemomasiwã. Caãñijũgoro na majũ yerire cũ jorãrẽ bairo caroaro marĩ Quetiupaure cũ tũgousa ãñupã. To bero jãã cũãrẽ na cacũgorije mena

jāā juátinemowā Dios cū caátirotirore bairo caroaro jicārō tūni yua. ⁶Bairi mujāātu cūārē tie mujāā caroaro mena mujāā caneorijē macāājērē butiuro cū jāā jerotijoya tunu Titore. Merē cajūgoyepu mujāā watoare tie ūnie mujāā caneorijērē jejūgoyupi. ⁷Mujāā roque nipetirijere netōjāñurō aperā netōrō caátimasirā mujāā āniña. Bairo caāna ānirī aperā netōjāñurō Jesucristo mena mujāā tūgoñatutuaya. Tunu aperā netōrō camasirā ānirī, aperā netōjāñurō Dios yaye quetire cūāārē quetibujñucūña. Tunu bairoa cotericoaro mano jicārō tūni caroa wāmerē mujāā átinucūña. Jāā cūārē aperā netōjāñurō jāā mujāā mainucūña. Bairo nipetirije caátianimasirā ānirī, netōjāñurō Jerusalén macāāna cabopacarārē cajuátinemoparā majū mujāā āniña.

⁸Bairua mujāārē rotiricarore bairo majū, ī mee ñiña. Aperā, cabopacarārē na cajuátimasirō cārō, na cajuāti īñonucūrjērē mujāā quetibujñu ñiña. Tiere masirī, mujāā cūā cariapea aperārē mujāā camairjērē mujāā āti īnomasigarā aperā camasārē. ⁹Marī Quetiupau Jesucristo nocārō cañuu ānirī marī camasārē cū cabopaca īñarjērē mujāā masiña. Cū puame nipetiro upau nimicūā, ati yeparure ācū, cabopacaure bairo āninucūñupī, mujāārē netōgu. Nipetirije marī cacūgoparore bairo ī, bairo baiyupi.

¹⁰Yū puame caroaro mujāā caátianipeere bou, atore bairo mujāārē yu quetibujya. Ji cūmarñrē, “Cabopacarārē na marī juátiroa,” īrīqūē jeto meerē mujāā āpū. Yoaro cotericoaro mano caroaro jicārōrē bairo tie dinerore mujāā jeneñoñupā. ¹¹Bairo mujāā caátimasirō cārō caāna ānirī mujāā caátigajūgoricarorea bairo caroaro jicārō tūni átiyaparocōāña.

Caānijūgoripaure caroaro useanirīqūē mena mujāā caátijūgomasiricārōrēā bairo átiyaparoya. ¹²Bairi ni jicāū ūcū cariapea cajogau cū caāmata, cū cajomasirō cārō cū joáto. Tore bairo cū caátimasirjērē Dios cariapea īñajesoyami. Bairo Dios puame cacūgoenarē īñamicūā, netōjāñurō jēnietinucūñami camasārē. Na cajomasirō cārō jeto jēninucūñami apeye ūnie na cajopeere.

¹³Mujāā puame cabopacarā Jerusalén macāānarē netōjāñurō juátimirā, cabopacanetōrārē bairo mujāā tuo joroque, ī mee ñiña. ¹⁴Jicārōrē bairo ānajēcusa ī, tore bairo ñi quetibujya. Āmerē mujāā cacūgorije ūnie mena na mujāā juátimasina. Cabero na cūā na cacūgorije ūnie mena mujāārē juátibujjiorāma. Tore bairo mujāā caāmeo āpata, ñe ūnie rusaeto jicārō tūni mujāā cūgogarā mujāārē carusarijere. ¹⁵Torea bairo ī quetibujya Dios yaye na cawaturica tutipū cūārē: “Jicāū capee cacūgon nimicūā, netōjāñurō cūgoetigumi. Apei petoaca cacūgon cūārē ñe cū rusaetigaro, petoaca cū cacūgomiatacūārē,” ī woatuyupa.

Tito y sus compañeros

¹⁶Caroaro mujāā caānipeere bou, butiuro yu catūgoñanucūrōrēā bairo Tito cūā cū tūgoñao joroque cū ásupi Dios. Bairo tiere tūgoñarī, yu puame, “Yū mena mu ñujāñuña,” cū ñinucūña Diopure. ¹⁷Bairi caānijūgoro Titore mujāā tpu yu caárotiro, caroaro mena yuwī. Caroaro mujāā caānipeere butiuro cabotūgoñau ānirī āmerē yua cū majūā cū caboro mujāā īñau áyami.

¹⁸Tito mena apeire mujāā tpu cū yu joya. Cū puame marī yaure bairo caācū, marirēā bairo catūgousau

niñami. Cārē nipetiro ñubueri majā caroaro cū busunucūñama, Jesucristo camasārē cū canetōrīqūē quetire cū cūā cū caquetibujūnetōncūrījē jūgori. ¹⁹Apeyera cūrē, ñubueri majā cū besewā jāārē cabapacutiñesēāpaure. Bairo dinero mujāā caneorīqūērē jāā cajeátó, cū cūā jāā mena bapacutiágumi. Bairo tie dinero neñorīqūērē jeátí, marí yarā Jerusalén macāānarē jāā cabatorije jūgori marí Quetiupaure camasā cū na basapeo joroque ána jāā átigarā. Tunu bairoa jāā bairo dinerore jorā, camasārē tutuaro marí caāmeo juátigarijere na masīō joroque ána jāā átigarā. ²⁰Jāā puame pairo dinerore neñorí, jāā cajeátiere ñnarí, butiuro mujāā cabusupairo jāā boetiya. Bairo capāārā mena tie neñorīqūērē jāā jeágaya. ²¹Bairi tunu caroaro jīcārō tūni jeto jāā átimasinucūña. Bairāpua marí Quetiupau cū caññajoro jeto meerē tore bairo jāā átinucūña. Camasā cūā caroaro na caññaparore bairo írā, tore bairo jīcārō tūni jāā átinucūña. ²²Na, yu cajorā menarē apei cūārē cū yu jonemoña marí yaure bairo caācūrē. Cū puame cañu majū niñami. Nipetiri wāme camasārē cotericaró mano cū cajuátigarijere jāā áti ñnonucūñami. Āme roquere yua, caroaro mujāā caátianie mena tūgoñatutuari netōjāñurō mujāā juátinmogayami. ²³Bairi aperā ūna mujāārē, “¿Noa cū āniñati Tito?” na caññeñaata, atore bairo na mujāā iwā: “Tito, Pablo bapa, cū mena capaari majōcu niñami. Jāārē cajuátinemoñu majū niñami,” na mujāā ī quetibujūwa. Tunu bairoa marí yarā Tito mena caānarē na cajēññatacūārē, atore bairo na mujāā iwā: “Ānoa aperā puamea, ñubueri majā na cajoricarā niñama. Na cūā marīrēā bairo Cristore* cañroari majā niñama,” na mujāā ī

quetibujūwa. ²⁴Bairi mujāā puame narē caroaro ñucūbugorique mena na bocáya. Na íroaya. Bairo na mujāā cañroarije quetire tūgorā, nipetiro ñubueri majā puari macāāna puame cariapea masīgarāma mujāā, Corinto macāāna, caroaro mujāā caátianierē jāā caquetibujūgoriquere.

La colecta para los hermanos

9 ¹Marí yarā, marírē bairo Dios mena catūgoñatutuarārē juátaje macāājē puamerā, capee mujāā yu caquetibujūwoatujopee mee niña bairopua. ²Merē caroaro mujāā Acaya yepa macāāna, mujāā majūā aperārē jīcārō tūni mujāā cajuátimasīrījērē yu masījāñuña. Bairi torea bairo cariape caroaro mujāā cajuátiere na yu quetibujūnucūña ato Macedonia yepa macāāna cūārē. Ji cūmapua mujāā puame cotericaró mano aperārē mujāā juátigawu. Bairo mujāā caátimasīrījērē tūgori, nipetiro jāñurīpua ato Macedonia yepa macāāna cūā mujāā caátorea bairo aperārē juátinmogayama. ³Tore bairo mujāārē ī quetibujūmicūā, marí yarārē mujāā tupa yu joya, mujāā cabairijere cariape yu cañmiatacūārē ricaati to cabaietiparore bairo ī yua. Yu cañrōrēā bairo cariape aperārē na mujāā juátiganucūña mujāā caátimasīrō cārō. Tere ato macāāna na masīátó ī, na yu joya marí yarārē. Bairo īgu niña: Caroaro jicoquei mujāā cajopeere mujāā qūēnoyuwa, īgu niña. ⁴Ape watoara ato Macedonia yepa macāāna mena ácu, mujāā cajopeere qūēnoyuena mujāā cacotero mujāā yu eta tāmwoaetiya. Tore bairo mujāā cabaleticōāta, bobooro jāā puame jāā tāmwobujiorā, “Caroaro juátimasīñama Corinto macāāna,” mujāā mena jāā cañtūgoñatutuamiatacūārē, tore bairo

jīcārō tūni mujāā caāpericōāta yua. Tunu bairoa mujāā cūā bobooro mujāā netōbujiorā, tore jīcārō tūni mujāā cajopeere neñorī mujāā cacoteeticōāta, ato Macedonia yepa macāāna na cañnarō yua. ⁵Tore bairo cabaipeere tūgoñamasirī, “Marī yarā aperārē na tūpū cajopee āno,” irī caānijūgoro mujāā tūpū caññahesēāparārē na yū jōjūgoyetiya. Tunu bairoa na puame torū etarā, mujāā caneñopee carusaata, mujāā jūneñorotibogajarāma, mujāā caātigajūgoricarorea bairo yua. Tore bairo mujāā majūā mujāā caneñoomasirījē jūgori yua, caroaro cabopacarārē na mujāā cajuátimasirījērē mujāā áti ñnogarā. Tore bairo mujāā majūā mujāā cajogarijere mujāā cajogaeticōāta, aperā butioro na cañpajūgoro jūgoripū cajori majārē bairo mujāā tuabujiorā.

⁶Cariape tūgoñañijate atie irīqūrē: “Petoaca otere caotei petoaca rīca jeyami; apei paio otere caotei paio rīca jeyami.” ⁷Bairi mujāā yeripū mujāā cajopeere tūgoñapetiri bero, mujāā cajomasirō cārō jīcārō tūni joya. Jogaetimirācūā, mujāā yeripū roro tūgoñarī mujāā cajoata, ñuētīña. Dios puame caroaro yerī ñurīqūrē mena marī cajogarijere marī cajoro caroaro ññauseaninucūñami. ⁸Cū puame tocānacā wāmerpua caroare paio majū mujāā jomasīñami. Bairo cū cajoata, mujāā puame ñe ūnie rusaricaro mano caroaro mujāā ānimasīgarā. Tunu bairoa tie mujāārē cū cajoriye carusarije ūnie mena tocānacā wāme caroaro átajere mujāā átimasīgarā camasā cabopacarā mena. ⁹Atore bairo Dios ya tutipū cūārē ī woatuyupa:

“Ni ūcū, cañuñ ānirī cabopacarārē caroaro mena na joyami narē carusarijere.

Bairo caroaro na cū caātiānie di rūmū ūno petietigaro.

Tocānacā rūmua nicōā ninucūgaro,” ī quetibūjuya Dios ya tutipūre.

¹⁰Dios puame, ote, marī caote ūgapeere cūñupī. Tunu bairoa ūgarique cūārē nipetirijere marī jonucūñami. Cū puame roque mujāā jogumi nipetirije mujāā caotepeere. Tunu bairoa cūā, tie mujāā caoterije to putio joroque átigumi. Bairo Dios cū caáto yua, mujāā puame paio mujāā cūgogarā. Tie mena caroaro jīcārō tūni cabopacarārē na mujāā juátinemo masīgarā. ¹¹Bairo Dios mujāā cū caáto jūgori, tocānacā wāme ñe ūnie rusaricaro mano mujāā cūgogarā Dios cū cajorijere. Tie mena aperā cabopacarārē caroaro jīcārō tūni na mujāā juátimasīgarā yua. Tunu bairoa mujāā majū neñorī cabopacarārē mujāā cajorijere jāā cajeáto ñnarā, na, marī yarā puame Diore butioro cū basapeogarāma. “Jāā mena mū ñumajūcōāña,” qūñgarāma Diore. ¹²Mai, tie marī yarārē mujāā caneñojorije jāā cajeátie puame, narē carusarijere jāā cajeátie jeto mee ñña. Caroaro na mujāā caátie jūgori Dios cūārē, “Jāā mena mū ñumajūcōāña,” na ībasapeo joroque ána mujāā átiya. ¹³Bairo mujāā caáto, na puame butioro cū basapeogarāma. Tore bairo na, cabopacarārē na mujāā cajuátie ñnarī, masīgarāma caria caroa queti Cristo yayerē mujāā catūgousarijere yua. Bairi na cūā Diore qūñroagarāma, nocārō caroaro narē na mujāā cajuátie jūgori. Tunu bairoa nipetiro aperā cabopacarā cūārē na mujāā cajuátie ñnarī, butioro Diore qūñroagarāma. ¹⁴Tunu aperyera na puame caroaro tūgoñamairīqūrē mena butioro Diopūre mujāā jēniboja nucūgarāma. Dios nocārō cañuñ ānirī narē mujāā jūgori caroaro na cū caátie ñnarī, na puame

butioro Diore cū basapeo nucūgarāma.
 15 Dios marī mena nūmajūcōānami.
 Nocārō cañuū ānirī cū macūrē marī
 joyupi. iTiere tūgoñarī ati risero mena
 dope bairo puame paio netōjāñurō ī
 basapeo masīā maa!

La autoridad de Pablo como apóstol

10 1 Yū, Pablo, Cristo caroaro
 mena cū cabeyorije, caroaro
 cū cañnamairijē mena mujāārē yu
 quetibujūya. Bairāpu, jīcāārā yure
 īnucūnama: “Ato marī watoapu
 āñesēāū, marī uwire bairo tutuaro
 mena mee marī quetibujūnucūnami.
 Bairo tutuaro mena mee
 quetibujūmicūā, yoaropu ācū puame,
 tutuaro netōrō marī quetibujū
 woajonucūnami,” nī busūnucūnama.
 2 Bairi mujāārē nīña: To mujāā tūpu
 yu cañnaū etari rūmū caāno, yure
 tore bairo roro caībusujārārē tutuaro
 mena na yu quetibujūo joroque yu
 na ápericōāto. iYū tutimasīña, tame!
 Na puame jāā busūpairā, “Na majū
 na catūgoñarijē mena jūgori na
 caātiānierē quetibujūnucūnama,” jāā ī
 busujānucūnama. Jāārē na cabusūpai
 jānaeticōāta, cotericarō mano tutuaro
 mena na yu tutigu. 3 Bairāpu, camasā
 ati rupau cacūgorā marī cañnierē marī
 masīña. Bairo marī cabaimiatacūārē,
 jāā puame ati ūmurecōo macāāna
 camasārē bairo jāā átiānajē cūperiya.
 4 Jāā catutuānie ati ūmurecōo
 macāājē ūnie mee nīña. Dios cū
 catutuarije mena jūgori roque carorije
 quetibujūriquere quetibujūnetōnucāo
 joroque jāā átimasīnucūña. Torea bairo
 roro na cabusūpainucūrījē cūārē jāā
 quetibujūpomasīña. 5 Bairi jāā puame
 Dios cū catutuarije jūgori tocānacā
 wāme ricaati aperā na cabue ēñotarije,
 Jesucristore na boetio joroque caātiere
 jāā, cariape jāā quetibujūpomasīña

camasārē. Bairo jāā caātimasīrījē mena
 camasā na majū na catūgoñarijē
 caroa wāme puame tūgoñawasoari,
 Cristo* cū caborore bairo na átiānio
 joroque na jāā átimasīña. Bairo
 jāā caātimasīrō yua, na puame cū,
 Cristore cū tūgousagarāma. 6 Bairi
 jāā puame cotericarō mano nipetiro
 Cristore cabaibotiorārē popiye na baio
 joroque na jāā átimasīgarā. Mujāā
 puame Jesucristore caroaro mujāā
 catūgousapetiro beropu, tore bairo na
 jāā popiye peyojānagarā.

7 Mujāā puame yu cabaurije bui
 macāājē jetore mujāā īnapeonucūña.
 Yū yeri yu catūgoñatutuarije puame
 roquere mujāā masīētīnucūña. Bairi
 nī jīcāū ūcū cariapea, “Jesucristo
 yau yu āniña,” cañnucū cū caāmata,
 jāā, Jesucristo yarā jāā caānie cūārē
 cū camasīpee nīña. 8 Yū puame jāā
 carotimasīrījē buipeoropu jāārē
 mujāā caīroapeere quetibujūmicūā,
 tie mena yu tūgoñaboboetiya. Marī
 Quetiupau puame roque tore bairo jāā
 carotimasīpeere jāā jowī. Jesucristo
 mena mujāā yeripu nemojāñurō cū
 mujāā catūgoñatutua nutuaparore
 bairo ī, tore bairo jāā roticūwī.
 Mujāārē jāā yapapu reo joroque
 ī mee, tore jāā quetibujū roticūwī
 marī Quetiupau. 9 Bairi yu puame yu
 cawoaquetibujūjorije mena, “Corinto
 macā macāāna na tūgoña uwiāto,” ī
 mee, tore bairo nī quetibujū woajoya.
 10 Aperā jīcāārā yu cawoajorijere īñarī,
 bairo īnucūnama: “Tutuaro mena
 marīrē quetibujū woatujomicūā, cū
 majū etau puame, tutuaro mena nī
 ūcūrē quetibujū masīētīnami. Tunu
 bairoa caroaro cariape caquetibujūesu
 nīnami,” nī busūpainucūnama. 11 Tore
 bairo jāārē roro caībusūpairā atore
 bairo na camasīrō yu boya: Yoaropu
 ānirī tutuaro yu caīquetibujūrorea

bairo mujã watoa acũ cã, yu caátie mena tutuaro mujã yu quetibuju masiãna. Tiera na camasirõ yu boya.

¹²Bairi jãã puame jãã majũã jãã cabairijere iñacõnarĩ, o aperã na majũã na caãnierẽ caroaro na cabusubotiorije mena na caĩrõrẽ bairo caĩbusuetiparã jãã ãniãna. Na, aperã puame catũgoñamasieña niñama, tore bairo cabusurã. Na puame na majũã na caátie mena busurã, o aperã na caátie mena icõnarã, roro catũgoñamasieña majũã ãna iñama. ¹³Bairi jãã puame roque tie ùnierẽ caãperiparã jãã ãniãna. Tiera jãã átirotietyami Dios. Cũ puame jicãrõ tũni jãã caátimasipeere cõnaricãrõrẽ bairo jãã átibojacũnucũñami. Bairi Dios puame roque mujãã Corinto macããna tupu jãã quetibujuñesẽãõ joroque jãã ámi. ¹⁴Bairi jãã puame mujããrẽ Cristo yaye caroa quetire caquetibujujõgoricarã majũã jãã ãniãna. Bairi mujããrẽ quetibuju ãna, jããrẽ Dios cũ caquetibujuroticũricãrõ netõjãñurõ ãna mee jãã átiya. ¹⁵Bairi jãã puame aperã mujãã watoapu na caquetibujuriquere iñarĩ, “Jãã roque tiera jãã quetibujuwu,” jãã iẽtĩnucũña. Jesucristo mena nemojãñurõ mujãã catũgoñatutuapeere borã, nemojãñurõ mujããrẽ jãã quetibujugaya. Bairo bori, Dios jããrẽ cũ caquetibujuroticũricãrõrẽ bairo jicãrõ tũnia quetibujurã jãã átiya. ¹⁶Bairo mujããrẽ quetibujuyaparori bero, mujãã jũgoye nocãrõ cayoaropu macããna cããrẽ caroa quetire quetibujuñesẽãgarã jãã átiya. Bairãpuã aperã caquetibujuri majã na caquetibujuñesẽãricã macãripu jãã quetibujurãpãrigarã. “Aperã na capaariquere emarã mujãã átiya,” jããrẽ i busupairema,” irã, to ùnopu jãã ánucũgaya.

¹⁷Tore bairo Dios yaye cãã i quetibujuya: “Ni jicãũ ùcũ, ‘Caroaro

majũ yu paamasieña,’ cũ majũã cũ caátimasirijẽ mena caĩnucũũ cũ caãmata, ‘Dios nocãrõ caroaro cũ camasirijẽ jũgori roque, caroaro yu paamasieña,’ cũ caĩpee puame roque ñuãna,” i quetibujuya Dios yaye busurique. ¹⁸Bairi ni jicãũ ùcũ cũ majũã cũ paariquere cũ caĩñajesoro netõjãñurõ wapacutiya cũ paariquere Dios cũ caĩñajesorije puame roque.

Pablo y los falsos apóstoles

11 ¹iBairi roro masacatiecure bairo yu caĩbusunucũrijẽrẽ mujãã canucãcõãmasirõ yu boya! Dise wãme ùnie yu caquetibujurije caãmata cããrẽ, tiera nucãnetõcõãña. ²Mujããrẽ roro tũgoñau mee yu baiya. Dios mujããrẽ iñamairĩ yu cũ caquetibujurotirique jũgori mujããrẽ quetibuju yu átiya. Dios mujããrẽ cũ caĩñamairõrẽã bairo yu cãã butioro mujããrẽ yu maiãna. Bairo mujããrẽ mairĩ yu puame jicãũã, Jesucristo jetore cũ mujãã catũgousaro yu boya. Bairo bori, mujããrẽ ñe ùnie cawapa cũgoena cañurã majũ cũ caĩñajoro mujãã bairo joroque yu átigaya, caroarã ñe ùnie cawapa cũgoena majũ Jesucristo tupure mujãã caetamasiparore bairo i. ³Baipua, aperã mujããrẽ na caĩtopee ùnierẽ yu tũgoña uwijãñuãna. Wãtĩ, cũ caĩtopairije mena Evare cũ caĩtoricarorea bairo mujãã cũã aperãrẽ mujãã caĩtocepee ùnierẽ yu tũgoña uwijãñuãna. Bairo mujããrẽ na caĩtoata yua, mujãã puame Jesucristore caboñarẽ bairo caroaro nucũbugorique mena jicãrõ tũni cũ mujãã iroaetibujiorã. ⁴Bairi noa ùna mujããrẽ jãã caquetibujujõgoricu Jesucristo yaye queti meerẽ caquetibujurã cããrẽ caroaro mena na mujãã tũgousaganucũña. Tunu

bairoa jãã caquetibujuricarero bero, Espiritu Santo majürë mujãã yeripũ cabocãñerĩcãã nimirãcũã, apeĩ espĩritu ùcũ cũãrẽ caroaro cũ mujãã ñeganucũña. Apeyera Dios yaye queti camasãrẽ cũ canetõrĩqũẽ quetire catũgousajũgoricarã nimirãcũã, ricaati quetibujuriquere caquetibujurã cũãrẽ na mujãã tũgousaganucũña.

⁵Baipua, mujãã catũgousanucũrã ùna caĩtopairã, jãã, apõstolea majã netõrõ caãnitũgoñarã roca majũ macããcũrẽ bairo yu tũgoñaẽtĩña.

⁶Yu puame yu cabusurije mena caroaro caquetibujurã ãmeomasĩecũ yu ãcũ. Bairo caãcũ nimicũã, Dios yaye macããjẽrẽ masĩrĩqũẽ puamerã yu masĩnetõmajũcõãña. Tie yu camasĩrĩjẽrẽ mujãã yu áti ñõõninucũña tocãnacãnia mujãã tũpũre. Noo jãã caátie wãme cãrõ mujããrẽ tiere jãã caátĩ ñõrõ mujãã ññanucũña.

⁷Yu puame mujããrẽ caroa queti Dios camasãrẽ cũ canetõrĩqũẽ queti majürë mujãã yu quetibujũgõwũ. Bairo tiere quetibujũ ãcũ, mujããrẽ yu wapa jẽniecũ. ¿Ricaati wãme mujããrẽ roro ácuato, tore bairo wapa jẽniecũ mujãã yu quetibujũyupari? Yu puame bopacooro yu baiwu, mujãã puame caroaro majũ mujãã caãnimasĩpeere boũ. ⁸Ape poari caãna ñubueri majã yũre dinero jowã, mujããrẽ yu cajuatimasĩparore bairo ñrã. Baipua bairo yũre na cadinero jorique jũgori narẽ dinero ãmaurẽ bairo yu ápu.

⁹Mujãã watoaru yu caquetibujũñesẽãrĩ watoare, yũre carusarije caãnimiatãcũãrẽ, di rũmu ùno jĩcãũ ùcũrẽ jũnurõ yu jeni patowãcõepũ. Marĩ yarã Macedonia yepa macããna puame roque yũre carusarijere yu jowã. Bairi mujããrẽ jũnuu yu cajeni patowãcõpeere yu ñcãcõãwũ. Baipua

bairo jeto yu ñcãmasĩcõã ninucũgu. ¹⁰Cristo nocãrõ caroaro cariape caquetibujũ cũ caãnierẽ camasĩ ãnirĩ cũrẽã bairo yu cũã cariape mujããrẽ ñña: Di rũmu ùno mujãã Acaya yepa macããnarẽ yu dinero jẽnipatowãcõcõcũ. Tiere tũgoñarĩ butioro yu yeri ñña.

¹¹¿Dopẽĩ bairo mujããrẽ ñi busucuti? ¿Mujããrẽ caĩñamaiecũ ãnirĩ tore bairo ñi busucuti? Bairo mee ñña. ¡Dios cũã caroaro masĩñami nocãrõ mujããrẽ yu caĩñamainucũrĩjẽrẽ!

¹²Mujããrẽ yu cabuerije wapare jẽniecũ, yu caquetibujũjũgoricarorea bairo wapa jẽniecũ yu quetibujũcõã ninucũgu. Aperã mujããrẽ na caquetibujurije wapa, wapa jẽnirĩ caquetibujũñesẽãnucũrã, “Pablora bairo jãã cũã jãã paanucũña,” na caĩmasĩetĩparore bairo ñ, di rũmu ùno mujãã yu wapa jẽnietĩgu. ¹³Na puame roque caĩtopairã, apõstolea majã mee ññama, “Apõstolea majã majũ jãã ãñaña,” caĩrã nimirãcũã. Bairo caĩrã nimirãcũã, na rupau bui jeto Jesucristo yarã apõstolea majãrẽ bairo bautonucũñama. ¹⁴Bairo na caãtomasĩnucũrĩjẽrẽ ñnarĩ, baipua yu tũgoña acuetiya. Ape watoara wãtĩ cũã umũrecõo macããcũ ángel bauriquere bairo bauriquecuti tomasĩnucũñami. ¹⁵Tore bairo wãtĩ cũã cũ cabaimasĩrõ jũgori, cũ yarã caĩtopairã cũrẽ catũgousari majã puame cũã caroare caátĩ majãrẽ bairo baurique cuti tomasĩnucũñama. ¡Bairãpua, na ùna jĩcã rũmu caãno yasĩ acagaráma, roro na caãtipairije wapa jũgori yua!

Sufrimientos de Pablo como apóstol

¹⁶Mujããrẽ yu caquetibujũjũgoricare bairo mujããrẽ ñinemoña tunu: Ni jĩcãũ ùcũ yũre, “Camecũrẽ bairo quetibujũyami Pablo,” yu qũĩ tũgoñaeticõãto. Bairo camecũrẽ

bairo yure mujãã caítũgoñata, camecũrẽã bairo yu caquetibujuriye yu tũgopecõãña mai. Mujãã tupu caña quetibujuri majã, na majũã na caátie mena netõnucãgarã, netõjãñurõ na caquetibujunucũrõrẽã bairo peeto ùno yu cããrẽ yu quetibuju roticõãña. ¹⁷Bairopña marí majũ marí caátie mena marí caãmeo netõnucãgarije cañuetie niña. Camecũrãrẽ bairo quetibujuriye niña. Marí Quetiupau cũ caĩñajesorije ùnie mee niña. ¹⁸Bairo cabaimiatacũãrẽ, bairõpña capããrã ninucũñama na majũã na caátie mena netõnucãgarã caquetibujupainucũrã. Bairi, iyu cũã tore bairo yu quetibujugaya! ¹⁹Mujãã puame catũgoñamasĩrãrẽ bairo tũgoñamirãcũã, inopẽĩrã catũgoñamasĩẽna yaye queti puamerẽ caroaro mena mujãã tũgousanucũñati, tame! ²⁰Tunu bairoa roro rotirique mena narẽ caroaro na mujãã cajuátinemopeere na cabomiatacũãrẽ, caroaro mena na mujãã tũgopeonucũña. Tunu bairoa mujããrẽ carotieperã, mujããrẽ caĩtori majã ùna cũãrẽ na mujãã ãñotaetinucũña. Tunu aperã mujããrẽ cabũgoro macããnarẽ bairo caĩñarerã, aperã mujããrẽ roro na cawasopana paepemiatacũãrẽ, caroaro mena na mujãã tũgopeonucũña. ²¹Mujããrẽ yu caĩpeere bobotũgoñamicũã, atore bairo mujãã ñiña: iJãã puame cayeritutuena majũrẽ bairo tie ùnierẽ na caátore bairo jãã átĩãnjã cuperinucũña! Bairi aperã na majũã na caátie mena caquetibujunucũrã netõrõ na caquetibujuata, yu cũã netõjãñurõ mujãã yu quetibuju masiña. Bairopña camecũrẽ bairo yu caquetibujuriye cabaimiatacũãrẽ, atore bairo mujããrẽ yu quetibujuya: ²²Mujãã tupu caña quetibujuri majã, “Jãã roque hebreo*

majã majũ jãã ãniña,” i botionucũñama na majũã na caquetibujuriye mena. Bairo na caĩata, yu cũã hebreo majã yaua yu ãniña. Tunu bairoa, “Israelita* majã Dios cũ cabesericarã jãã ãniña,” na caĩata, yu cũã israelita majã yau majũã yu ãniña. Tunu, “Abraham ãnacũ pãrãmerã majũ jãã ãniña,” na caĩata, yu cũã cũ pãrãmi majũã yu ãniña. ²³Tunu bairoa, “Cristore* paabojari majã jãã ãniña,” na caĩatacũãrẽ, yu roque na netõjãñurõ cũrẽ capaabojari majõcu majũ yu ãniña. Bairopña, atiere bairo yu caĩbusuata, camecũrẽ bairo ñiña. Yu puame roque na netõjãñurõ Dios yayerẽ yu paanucũña. Na netõjãñurõ capee majũ popiye preso jorica wiipu yu jo epenucũñama. Tunu bairo na netõjãñurõ capee majũ yu bape econucũwũ. Dios yaye macããjẽrẽ yu caquetibujuriye jũgori capee majũ yu pajĩã ecobujionucũwũ. ²⁴Jĩcã wãmo cãnacãni majũ judfõ majã quetiuparã yu ñewã. Bairo yu ñerĩ yua, treinta y nueve cãnacãni majũ yu bape epenucũwã, yure na cañenucũrõ cãnacãnia. ²⁵Itiani cãnacãni majũ yucu mena yu paepewã. Jĩcãni ùtã rupaa mena yu wẽjĩã rocabujiowã. Tunu bairoa itiani cãnacãni majũ cũmua capairicapu ãñesẽãũ, yu ruawũ. Bairo jĩcãni yu caruari rũmu caño yoaro, umõreco, ñami cũãrẽ yu baa pasawu ria capairiya recomacã majũpũre. Yu riacoabujionu. ²⁶Bairo aperoripu caãnarẽ quetibuju ñesẽãgu, roro majũ yu tãmuonucũña. Bairo ãñesẽãnucũũ, riyaa cauwiopõru cũãrẽ yu ãnucũwũ. Tunu bairo uwiorõ cajerutiri majã na capairõpu yu netõ ãnucũwũ. Yu yarã jĩcã yepa macããna judfõ majã nimirãcũã, yu wapãnarẽ bairo caña watoapu yu ãñesẽãnucũwũ. Tunu bairo aperã ape yepa macããna tũripu cũãrẽ uwiorõ yu ãñesẽãnucũwũ. Tunu

bairoa capaca macããpũ, camasã na camanorĩpũ cũãrẽ uwioro yu baiñesẽãwũ. Ria capairiya cũãrẽ uwioro yu baiñesẽãwũ. Tunu apeyera, “Jesucristore catũgousarã jãã ãniña,” cabũgoroa caĩtopairã watoa cũãrẽ uwioro yu baiñesẽãnucũwũ, aperoripũ caãnarẽ quetibũjuñesẽãgũ. ²⁷ Capee majũ popiye yu paanucũwũ. Apeyera roro popiye yu tãmuonucũwũ. Tunu capee majũ yu wũgoa tãmuonucũwũ yu paarique jũgori. Tunu bairoa capee majũ etigu, o ugarique ugagu, popiye yu ana nucãnucũwũ. Ape watoara capee jutii cacũgoesu ãniri roro bopacooro yu yusũaye tãmuonucũwũ.

²⁸ Atie mujããrẽ yu caquetibũjuriye, apeye mujããrẽ yu caquetibũjuetiataje mena popiye majũ tãmuonucũmicũã, tocãnacã rũmua mujãã, o aperã Dios ya poari macããna cũãrẽ caroaro na caãnipeere boũ, butioro yu tũgoña patawacãnucũña. ²⁹ Bairi ni jĩcãũ ùcũ mujãã mena macããcũ Jesucristo yaure cũ yapapua joroque aperã cũ na caápata, yu cũã cũ mena yu yapapua tũgoñanucũña. Tunu bairo ni ùcũrẽ roro cũ átio joroque aperã cũ na caápata, yu cũã butioro majũ yu tũgoña asianucũña. ³⁰ Yu puame, “Aperã netõrõ caquetibũjumasĩ yu ãniña,” ïricãrõ ùnorẽã, catutuaesu yu caãnierẽ bairo mujãã yu quetibũju ïnogu. Botiorique mena tutuaro yu quetibũjugaetiya mujããrẽ. ³¹ Dios, marĩ Quetiupau Jesucristo pacu cũã masĩmajũcõãñami caroaro cariape yu caquetibũjunucũrĩjẽrẽ. Cũrẽã tocãnacã rũmua cũ marĩ cabasapeoro ñũña. ³² Apeyera Damasco macãpũ yu caãno quetiupau rey Aretare cajuroti gobernador* puame yu ñerotimiñupĩ. Bairo yure cañegau ãniri, cũ ñmua soldauare* ti macã witorica joperepũ na coterotiyupi, yure na ñeo joroque ï.

³³ Bairo yure cũ cañerotirijere tũgori yua, aperã marĩ yarã puame yu juãma. Ti macã ãñotaricarõ jũgoyepũ pii capairi pii mena yu jããrĩ, wii waru joperepũ yu pitiyo ruiojowã. Tore bairo yu na caáto, yu rutimasĩwũ quetiupau gobernador yure cañegaure.

Visiones y revelaciones

12 ¹ Ñe ùnie majũ marĩ átimasĩtẽtĩña, marĩ majũã marĩ caátiere marĩ caĩbusuata. Bairo cabaimiatacũãrẽ, yu puame marĩ Quetiupau quẽguericarore bairo yu cũ caĩnorĩqũẽ, cũ yaye macããjẽrẽ yu cũ caátibuio ïnorĩqũẽ macããjẽ cũãrẽ mujãã yu quetibũjugaya. ² Jĩcãũ caũmurẽ ñiñawũ caroaro majũ Cristore* jĩcãrõ tũni catũgousacõãninucũũrẽ. Cũ puamerẽ itia umũrecõo tuti buipũ cũ neámĩ Cristo. Merẽ puga wãmo peti rupore baparicãnacã pẽnirõ cãnacã cũma majũ netõña cũrẽ cũ caneátato bero. Baipua caroaro majũ yu masĩtẽtĩña: Ati rupau menaa, o cũ yeri jetore rita neácũ baibauwĩ. Dios roque cariape cũ caátajere masĩnami. ³⁻⁴ Baipua caroaro majũ yu masĩña: Cũrẽ Dios nocãrõ caroaro caãno cũ tũpũ cũ neámĩ. (Ati rupau menaa o cũ yeri jetore rita neácũ baibauwĩ.) Topũ etaácũ, cũ puame busuri cayasiorije, ni ùcũrẽ Dios cũ busurotietie ùnie busurique majũrẽ tũgoroyawĩ.

(Mai, Pablo puame versículos

2-4 apei cũ cabairiquere ï quetibũjũmicũã, cabotiogaesu ãniri cũ majũã cũ cabairiquere quetibũjugũ ïcũmi.)

⁵ Bairo yu roque tore bairo camasĩ ãniri caroaro netõrõ tie mena jũgori yu baibotio ïñobujioya ni ùcũ camasocure. Bairo masĩmicũã, baipua yu majũã yu camasĩrĩjẽ mena tore bairo yu

átibotioogaetiya. Tie ũnie meerē, yu majũā yu cayeri tũgoñatutuaetie roquere torea bairo mujãā yu caátĩ ñnoata, ñucõābujioro. ⁶Bairo netõjãñurõ yu majũā yu caátiere, o yu caĩrĩjērē quetibujumicũā, camecũrē bairo quetibujũ mee yu baiya baipua. Cariapea quetibujũ roque tore bairo ñinucũmiña. Bairo caĩ nimicũā, baipua buipearo ni jĩcãũ ũcũ tie yu caáperie, o yu caĩtētē jũgori yu cũ caĩroacotero yu boetiya. Caroaro yu caátĩāninucũrĩjērē ñnabeseri roque yu cũ caĩroaro ñña.

⁷Bairo marĩ Quetiupau yaye macãājē nocãrõ caroare yu cũ caátibuio ñnorĩqũē mena jũgori yu cabaiotioetiparore bairo ĩ, wãtĩ roro yu cũ caátiere ãñotaemi Dios. Tie jũgori popiye pota marĩ rupaure cañnorē bairo wãtĩ roro yure cũ caátiere ãñotaemi Dios. Tie jũgori popiye pota marĩ rupaure cañnorē bairo wãtĩ roro yure cũ caátie ninucũña. ⁸Bairo roro popiye yu cabaiānierē yu cũ netõátõ ĩ, itiani cānacāni majũ Diore cũ yu jēnimiwũ. ⁹Bairo itiani yu cajēnimiatacũārē, itianipua atore bairo ñi quetibujuwĩ: “Mu caĩrõrē bairo yu áperigu. Yu yarã popiye baimirãcũā, narē yu mena na tũgoñatutuo joroque na yu caátie jũgori, nipetiro camasārē yu catutuarijere nemojãñurõ na ñĩnomasiña,” ñi quetibujuwĩ. Bairo popiye yu catãmũorĩjērē tũgoñarĩ, tie mena yu tũgoña useanicõãña. Tie jũgori nipetiro camasārē Cristo yu cũ catutuarije jorijere na yu áti ñĩnomasiña. ¹⁰Tunu bairoa atiere tũgoñarĩ yu useaniña: Catutuaecũre bairo roro popiye yu cabairije, roro yure na cañawajatutinucũrĩjē, yure carusarije cũārē tũgoñarĩ yu useaniña. Apeyera Jesucristore yu catũgousarije jũgori yure na capajĩāga ñesēānucũrĩjē,

tunu Jesucristo jũgori popiye capee wãme yu cabainucũrĩjērē tũgoñarĩ yu useaniña. Bairo roro popiye catutuaecũre bairo majũ tãmũonucũũ puame roque nemojãñurõ Cristo jũgori catutuaure bairo majũ yu tũgoñanucũña.

Preocupación de Pablo por la iglesia de Corinto

¹¹Yu majũā camecũrē bairo ñiētĩña. Mujãā roque camecũrē bairo ñio joroque yu mujãā ápu. Mujãā puame roque yu caátĩānierē caroaro yure cabusũparã mujãā ānimaña. Bairo yure caroaro cabusũparã nimirãcũā, bairo mujãā áperinucũña. Cabũgoro macãācũrē bairo caācũ nimicũā, baipua na, mujãā catũgousanucũrã, jãā apóstolea majã netõrõ cañnitũgoñarã roca macãācũrē bairo yu ānitũgoñaētĩña. ¹²Bairo popiye tãmũomicũā, mujãā tũpu ācũ, nipetiri wãme nocãrõ Dios cũ catutuarije mena áti ñnorĩqũērē mujãā yu áti ñnoāninucũwũ. Tore bairo caroaro yu caátimasĩrĩjē jũgori cariapea Jesucristo yau apóstol majũ yu caānierē mujãā masĩõ joroque yu áti ñnomiwũ. ¹³Baipua jĩcã wãme jeto aperã Jesucristore catũgousari majã poarire yu caátinucũrõrē bairo mujãā yu ápewũ. Yure carusarije cañnimaatacũārē, di rũmu ũno patowãcõrõ mujãārē yu jēnipatowãcõepũ. Tore bairo mujãārē yu cajēnietĩē to cañueticõāta, itiere yu mujãā masiriyobojawa!

¹⁴Mujãā tũpu águ, merē qũēnojũgoyeti ācũ yu átiya. Atie yu caápēe mena itiani majũ merē mujãā tũpura ññañesēāgu. Bairo ati watoare ácu cũā, mujãā apeye ũnierē cajēnipatowãcõũrē bairo yu baietigu. Capacua puame na pũnaarē

carusarijere na jomasinucūñama. Na pūnaa puame mee na pacuare carusarijere na jonucūñama. Bairi yu puame mujāā yu pūnaarē bairo mujāā cañnoi, dise ūnie mujāā cacūgorijere mujāā yu jēnipatowācōētīgu. Yure mujāā caīroapee puame jetore yu boya. ¹⁵Bairna, dise yu cacūgorije caetatuaro cārō mujāārē yu juátinemoḡu. Yu majū rupau mena cūārē popiye yu tāmomasīña, mujāā puame caroaro mujāā cañnimasīpeere bori. Bairo mujāārē netōjāñurō yu camaimiatacūārē, mujāā puame nemojāñurō yure camaiena majū mujāā tuanucūña.

¹⁶Bairo mujāārē di rūmu ūno apeye ūnierē yu cajēnipato wācōetimiatacūārē, jīcāārā atore bairo īnucūñama: “Pablo masīrī, marīrē itou ātiyami. Di rūmu ūno caño marī camasīeto yua, apeye ūnie marī cacūgorijere jemasīḡumi,” īnucūñama. ¹⁷Bairi, ¿mujāā tɔpu yu cajoricarā mujāārē itori apeye ūnie mujāā cacūgorijere mujāā na ēmarī? Ni jīcāū ūcū mujāārē itori mujāā yayere ēmaesupi. ¹⁸Yu puame Titore mujāā tɔpu cū yu jowu. Cū mena apeī marī yau Jesucristore catūḡousau cūārē cū yu jowu. Bairo mujāātu yu cajoricu Tito tɔpu ācū, ¿mujāārē qūitori? Mujāārē jīcāni ūno itoetacumi. Jāā, cū mena puḡarāpu jīcārō tūni jāā ānajē cutiya. Jāā, puḡarāpu jīcā yerire bairo jāā yeri cutinucūña.

¹⁹Ape watoara atore bairo puame mujāā tūḡoñabujiorā: “Caroaro jāārē na nūcūbūḡoāto īrā, tore bairo īrāma,” jāārē mujāā ī tūḡoñarā. Bairo mee jāā baiya. Yu yarā, yu camairā, Dios cūā tore bairo bori, jāā caátigatūḡoñarījērē masīcōāñami. Dios mena nemojāñurō mujāā catūḡoñatutuapee puame roquere bori, tore bairo mujāārē jāā

quetibujū āninucūña. ²⁰Mujāārē yu caññañesēāūátī rūmu caño, caroaro yu mujāā cañniyuro yu boya. “Ape watoara ricaati niyubujiorāma,” ī tūḡoñarī, yu tūḡoña uwiya. Carorije macāājē mena mujāā caño mujāā yu eta tāmūogaetiya. Atie ūnie carorije nibujioro mujāā watoare bairoua: Āmeo tutīrique, āmeo īña uḡorique, āmeo asiarique, aperā netōrō baitūḡoñarīqūē, roro āmeo busupairique, causarou busupairique, āmeo botiorique, caroaro jīcā yericutiri ānimasīētājē cūā nibujioro. Tere tūḡoñarī yu puame yu tūḡoña yapapuajāñuña. Bairo mujāā caāmata, mujāā cūā butioro mujāā yapapuabujiorā, mujāārē yu catutipeere tūḡoñarī yua. ²¹Tunu bairoa ati watoa mujāārē yu caññañesēāūátī rūmu caño, roro mujāā cañnie jūḡori yu Quetiupau Dios puame mujāā mena yu tūḡoñabooḡo joroque yu átibujioūmi. Nocārō yoaro carorije macāājērē mujāā caátīāninucūrījērē tūḡoñarī, butioro yapapuari yu otio joroque yu átibujioūmi. Capārā mujāā mena macāāna tocānacā wāme roro ati rupau mena átieperique ūnierē áti jānaetinucūñama. Tie nipetirijere tūḡoñarī yu majūpu butioro yu tūḡoña yapapuajāñuña.

Advertencias y saludos finales

13 ¹Atie mujāā yu caññañesēāūāpee mena merē itiani majū mujāā tɔpɔre nīña ñesēāāḡú. Dios ya tutipɔ bairo ī quetibujū woatuyupa: “Puḡarā, o itiarā ūna, apeī roro caátacɔre na cabusujārō ñuña. Bairo na, itiarā ūnapua jīcārōrē bairo na cabusujāata, nipetiro catūḡorā cūā na caīrōrē bairo átimasīñama,” ī quetibujuya Dios ya tutipɔ. ²Bairi

mujãã tɔpɔ caãna carorijere caátanarẽ, o nipetiro to caãna cããrẽ ãme ato mai cayoaropua ãcũ, jicãni bero tunu mujããrẽ ñnau etanemou yu caquetibɔjuricarorea bairo ñinemoña tunu: Ati watoa mujããrẽ tunu yu caña ñesẽãnemou ápáta, roro caátipairãrẽ yu bopaca ñnaecũ yua. Roro popiye na baio joroque na yu átigu. ³Mujãã puame mai yure caria Jesucristo yu cũ cajuátiere masigarã, jicã wãme áticõna macããrã mujãã átiya. Jaɔ, toroque mujããtu ãcũ, mujããrẽ yu áti ñnogũ cũ catutuarijere. Cristo puame catutuaecure bairo mujãã watoare ãcũrẽ bairo bainucũñami. Bairo cabai nimicũã, nocãrõ cũ catutuarijere mujãã áti ñnomajũcõãnucũñami yu jũgori mujãã turipure. ⁴Bairãpua, cariapea marĩ masiña catutuaecurea bairo yucɔpãipũ papuatuecori riariquere. Bairo papuatuecori cariaricũ nimicũã, Dios cũ camasĩrĩjẽ jũgori cacatiricũ majũ niñami. Jãã cũã bairãpua Jesucristorea bairo roro popiye jãã tãmɔnucũña. Bairo popiye baimirãcũã, Jesucristore capitiena ãnirĩ jãã cũã cũrẽã bairo jãã ãnigarã Dios cũ catutuarije jũgori, mujããrẽ juátinemogarã yua.

⁵Bairi mujãã majũã caroaro mujãã caátianierẽ tũgoña besemasĩña. ¿Cariapea Jesucristo mena marĩ tũgoñatutuamiñati? mujãã caítũgoñamasiparore bairo ñrã, caroaro tũgoña beseya mujãã caátiere. ¿Mujãã yeripũ Jesucristo cũ caãnierẽ mujãã tũgoñamasĩetĩñati? Caítupairãrẽ bairo cabũgoroa, “Jesucristo yarã jãã ãniña,” mujãã caĩata roque, Jesucristo mujãã yeripũ mácũmi. ⁶Bairo ñnicũã, baipua yu puame mujãã mena yu tũgoñatutuacõãña. Bairi jããrẽ bairãpua cariapea Cristo yarã jãã caãnierẽ mujãã masicõãrã.

⁷Bairi jãã puame mujããrẽ Diopure jãã jẽnibojanucũña, dise ñnie carorije macããjẽrẽ mujãã caáperiparore bairo ñrã. “Na netõrõ caroarã majũ jãã ãniña,” igrã mee, mujããrẽ tore bairo jãã átibojagarã. Caroa macããjẽ puame roque mujãã caátianiparore bairo ñrã, tore bairo jãã átigarã. “Cabũgoroa quetibɔjurã átiyama,” camasã jãã na caĩmiatacũãrẽ, bairãpua tore bairo jãã átigarã. ⁸Jãã puame dopẽirã cariape macããjẽrẽ ricaati puame jãã baibotiomasiẽtĩña. Cariape macããjẽ quetibɔjurique caĩrõrẽ bairo puame jeto roque jãã caátimasĩnucũpẽe niña. ⁹Bairi jãã puame jããrẽ caĩñaterã cayeritutuenaerẽ bairo jãã na caĩmiatacũãrẽ, tũgoña useanirĩquẽ mena jãã ãnicõãnucũña. Mujããrẽ juátigarã, tie mena jãã puame popiye jãã catãmɔnucũrĩjẽ jũgori nemojãñurõ Dios mena mujãã catũgoñatutuapeere tũgoñarĩ jãã useaninucũña. Bairi tocãñacã rũmua mujããrẽ Diopure jãã jẽnibojanucũgarã, caroaro mujãã caátianie ñe ñnie to carusaetiparore bairo ñrã. ¹⁰Bairi ati carta mena mujãã yu quetibɔju woajoya, mujãã tɔpɔ yu caĩñañesẽãũ ápáro jũgoye. Topɔ yu caetaparo jũgoye roro mujãã caátianierẽ mujãã majũã quẽnocõãña. Bairo mujãã caápata, yu puame topɔ etau, tutuaro mena mujãã yu quetibɔjuetigu. Marĩ Quetiupau puame roque tore bairo yu carotimasĩpeere yu jowĩ. Jesucristo mena mujãã yeripũ nemojãñurõ cũ mujãã catũgoñatutuanutuparore bairo ñ, tore bairo yu roticũwĩ. Mujããrẽ yu yapapuo reo joroque ñ mee, tore yu quetibɔju roticũwĩ marĩ Quetiupau. ¹¹Yu yarã, mujããrẽ yu cawoajo yaparoparo jũgoye atore bairo mujãã ñiña: Caroaro useanirĩquẽ mena ãnajẽcusa. Caroaro átiãnjẽ

puamerē átiánimasíña. Tocānacāũpua
 caroaro yeri ñurō ámeo átiánajēcusa.
 Tunu bairoa jīcā yericunarē bairo
 ānajēcusa. Marī Pacu Dios ámeo
 mairīqũērē, bairi jīcā yericutaje cūārē
 cajou mujāā mena cū āmarō. ¹²Tunu
 bairoa caroaro ñucūbugorique mena
 ámeo bocári ámeo jēniña. ¹³Marī
 yarā ato macāāna Jesucristore

catũgousarā nipetiro mujāārē ñuroti
 joyama.

¹⁴Jesucristo marī Quetiupau caroare
 cū jonemoáto mujāā nipetirore. Tunu
 bairo marī Pacu Dios nocārō marīrē
 camai, bairi cū Yeri Espiritu Santo cūā
 mujāā mena cū ānicōā ninucūáto.

Tocārōā niña atie queti yu
 cawoaturije.